


韓文三



PL
2670
A1
1854
v. 3



韓文卷之十三

雜著

子產不毀鄉校頌

我思古人伊鄭之僑以禮相國人未安其教遊于鄉之校
 衆口嚶嚶或謂子產毀鄉校則止曰何患焉可以成美夫
 豈多言亦各其志善也吾行不善吾避維善維否鄙音我於
 此視川不可防言不可弭下塞上壅邦其傾矣既鄉校不
 毀而鄭國以理在周之興養老乞言及其已衰謗者使監
 成敗之迹昭哉可觀維是子產執政之式維其不遇化止
 一國誠率是道相天下君交暢旁達施及無垠於虘四海
 所以不理有君無臣誰其嗣之我思古人



釋言

元和元年六月十日。愈自江陵法曹。詔拜國子博士。始進見。今相國鄭公。公賜之坐。且曰。吾見子某詩。吾時在翰林。職親而地禁。不敢相聞。今爲我寫子詩書。爲一通。以來。愈再拜謝。退錄詩書若干篇。擇日時以獻。於後之數月。有來謂愈者曰。子獻相國詩書乎。曰然。曰有爲讒於相國之座者曰。韓愈曰。相國徵余文。余不敢匿。相國豈知我哉。子其慎之。愈應之曰。愈爲御史。得罪德宗朝。同遷于南者。凡三人。獨愈爲先收用。相國之賜大矣。百官之進見相國者。或立語以退。而愈辱賜坐語。相國之禮過矣。四海九州之人。自百官已下。欲以其業徹相國左右者多矣。皆憚而莫之。

敢獨愈辱先索。相國之知至矣。賜之大禮之過。知之至是。三者於敵以下受之。宜以何報。況在天子之宰相乎。人莫不自知。凡適於用之謂才。堪其事之謂力。愈於二者。雖日勉焉而不近。束帶執笏。立士大夫之行。不見斥以不肖。幸矣。其何敢敖於言乎。夫敖雖凶德。必有恃而敢行。愈之族親鮮少。無扳聯之勢於今。不善交人。無相先相死之友於朝。無宿資蓄貨以釣聲勢。弱於才而腐於力。不能奔走乘機。抵巇以要權利。夫何恃而敖。若夫狂惑喪心之人。蹈河而入火。妄言而罵詈者。則有之矣。而愈人知其無是疾也。雖有讒者百人。相國將不信之矣。愈何懼而慎歟。旣累月。又有來謂愈曰。有讒子於翰林舍人李公與裴公者。子其慎。

歟。愈曰：二公者，吾君朝夕訪焉，以爲政於天下，而階太平之治，居則與天子爲心膂，出則與天子爲股肱，四海九州之人，自百官已下，其孰不願忠而望賜？愈也不狂不愚，不蹈河而入火，病風而妄罵，不當有如讒者之說也。雖有讒者百人，二公將不信之矣。愈何懼而慎？旣以語應客，夜歸，私自尤曰：咄當沒切，市有虎，而曾參殺人，讒者之效也。詩曰：取彼讒人，投畀豺虎。豺虎不食，投畀有北。有北不受，投畀有昊。傷於讒疾而甚之之辭也。又曰：亂之初生，僭始旣活，亂之又生，君子信讒，始疑而終信之之謂也。孔子曰：遠佞人，夫佞人不能遠，則有時而信之矣。今我恃直而不戒禍，其至哉！徐又自解之曰：市有虎，聽者庸也。曾參殺人，以愛

惑聰也。巷伯之傷亂世是逢也。今三賢方與天子謀所以施政於天下而階太平之治。聽聰而視明。公正而敦大。夫聰明則聽視不惑。公正則不邇讒邪。敦大則有以容而思。彼讒人者孰敢進而爲讒哉。雖進而爲之亦莫之聽矣。我何懼而慎。旣累月上命李公相。客謂愈曰。子前被言於一相。今李公又相子。其危哉。愈曰。前之謗我於宰相者翰林不知也。後之謗我於翰林者宰相不知也。今二公合處而會言。若及愈必曰韓愈亦人耳。彼敖宰相又敖翰林。其將何求。必不然。吾乃今知免矣。旣而讒言果不行。

愛直贈李君房別

左右前後皆正人也。欲其身之不正。烏可得邪。吾觀李生

在南陽公之側有所不知知之未嘗不爲之思有所不疑疑之未嘗不爲之言勇不動于氣義不陳乎色南陽公舉措施爲不失其宜天下之所窺觀稱道洋洋者抑亦左右前後有其人乎凡在此趨公之庭議公之事者吾旣從而遊矣言而公信之者謀而公從之者四方之人則旣聞而知之矣李生南陽公之甥也人不知者將曰李生之託婚於貴富之家將以充其所求而止耳故吾樂爲天下道其爲人焉今之從事於彼也吾爲南陽公愛之又未知人之舉李生於彼者何辭彼之所以待李生者何道舉不失辭待不失道雖失之此足愛惜而得之彼爲歡忻於李生道猶若也舉之不以吾所稱待之不以吾所期李生之言不

可出諸其口矣。吾重爲天下惜之。

張中丞傳後叙

元和二年四月十三日夜，愈與吳郡張籍、閔家中舊書，得李翰所爲張巡傳。翰以文章自名，爲此傳頗詳密，然尚恨有闕者，不爲許遠立傳，又不載雷萬春事。首尾遠雖材，若不及巡者，開門納巡，位本在巡上，授之柄而處其下，無所疑忌，竟與巡俱守死，成功名，城陷而虜，與巡死先後異耳。兩家子弟材智下，不能通知二父志，以爲巡死而遠就虜，疑畏死而辭服於賊，遠誠畏死，何苦守尺寸之地，食其所愛之肉，以與賊抗而不降乎？當其圍守時，外無此蟬蟻子之援，所欲忠者，國與主耳，而賊語以國亡主滅，遠見救援

不至而賊來益衆必以其言爲信外無待而猶死守人相
食且盡雖愚人亦能數日而知死處矣遠之不畏死亦明
矣烏有城壞其徒俱死獨蒙愧耻求活雖至愚者不忍爲
嗚呼而謂遠之賢而爲之邪說者又謂遠與廵分城而守
城之陷自遠所分始以此詬遠此又與兒童之見無異人
之將死其藏腑必有先受其病者引繩而絕之其絕必有
處觀者見其然從而尤之其亦不達於理矣小人之好議
論不樂成人之美如是哉如廵遠之所成就如此卓卓猶
不得免其他則又何說當二公之初守也寧能知人之卒
不救棄城而逆遁苟此不能守雖避之他處何益及其無
救而且窮也將其創平聲殘餓羸之餘雖欲去必不達二公

之賢其講之精矣守一城捍天下以千百就盡之卒戰百萬日滋之師蔽遮江淮沮遏其勢天下之不亡其誰之功也當是時棄城而圖存者不可一二數擅疆兵坐而觀者相環也不追議此而責二公以死守亦見其自比於逆亂設淫辭而助之攻也愈嘗從事於汴徐二府屢道於兩府間親祭於其所謂雙廟者其老人往往說巡遠時事云南霽雲之乞救於賀蘭也賀蘭嫉巡遠之聲威功績出已上不肯出師救愛霽雲之勇且壯不聽其語疆留之具食與樂延霽雲坐霽雲慷慨語曰雲來時睢陽之人不食月餘日矣雲雖欲獨食義不忍雖食且不下咽因拔所佩刀斷一指血淋漓以示賀蘭一座大驚皆感激爲雲泣下雲知

賀蘭終無爲雲山師意。即馳去。將出城。抽矢射佛寺浮圖。矢著其上。輒半箭曰。吾歸破賊。必滅賀蘭。此矢所以志也。愈貞元中過泗州。船上人猶指以相語。城陷。賊以刃脅降巡。巡不屈。即牽去。將斬之。又降霽雲。雲未應。巡呼雲曰。南八。男兒死耳。不可爲不義屈。雲笑曰。欲將以有爲也。公有言。雲敢不死。即不屈。張籍曰。有于嵩者。少依於巡。及巡起事。嵩常在圍中。籍大曆中。於和州烏江縣見嵩。嵩時年六十餘矣。以巡初嘗得臨渙縣尉。好學。無所不讀。籍時尚小。粗問巡遠事。不能細也。云。巡長七尺餘。鬚髯若神。嘗見嵩讀漢書。謂嵩曰。何爲久讀此。嵩曰。未熟也。巡曰。吾於書讀不過三徧。終身不忘也。因誦嵩所讀書。盡卷不錯一字。嵩

驚以爲巡偶熟此卷。因亂抽他帙以試。無不盡然。嵩又取架上諸書。試以問巡。巡應口誦無疑。嵩從巡久。亦不見巡常讀書也。爲文章。操紙筆立書。未嘗起草。初守睢陽時。士卒僅萬人。城中居人戶亦且數萬。巡因一見問姓名。其後無不識者。巡怒鬚髯輒張。及城陷。賊縛巡等數十人坐。且將戮。巡起旋。其衆見巡起。或起或泣。巡曰。汝勿怖。死命也。衆泣不能仰視。巡就戮時。顏色不亂。陽陽如平常。遠寬厚長者。貌如其心。與巡同年生。月日後於巡。呼巡爲兄。死時年四十九。嵩貞元初死於亳。宋間。或傳嵩有田在亳。宋間。武人奪而有之。嵩將詣州訟理。爲所殺。嵩無子。張籍云。

河中府連理木頌

司空咸寧王尹蒲之七年木連理生于河之東邑野夫來告且曰吾不知古殆氣之交暢也維吾王之德交暢者有五是其應乎訓戎奮威蕩戮凶回舉政宣和人則寧嘉入踐台階庶尹克司來帥熊羆四方作儀閔仁鰥寡不寧燕息人樂王德祝年萬億府有群吏王有從事異體同心歸民千理天子是嘉俾錫勞王王拜稽首天子之光庶德昭融神斯降祥殊本連理之柯同榮異壟之禾吾侯之產茲土也久矣今欲明于大君紀于策書王抑余也冶金伐石垂耀無極王抑余也奮肆姁音媮媮音媮不知所如願託頌詞長言之于康衢頌曰

木何爲兮此祥洵厥美兮在吾王願封植兮永固俾斯人

今不忘。

汴州東西水門記

并序

貞元十四年正月戊子。隴西公命作東西水門。越三月辛巳朔。水門成。三日癸未。大合樂。設水嬉。會監軍軍司馬賓佐僚屬將校熊羆之士。肅四方之賓客。以落之。士女醵會。闐郭溢郭。既卒事。其從事昌黎韓愈請紀成績。其詞曰。

維汴州河水自中注。厥初距河爲城。其不合者。誕寘聯鎖于河。宵浮晝湛。舟不潛通。然其襟抱虧䟽。風氣宣洩。邑居弗寧。訛言屢騰。歷載已來。孰究孰思。皇帝御天下。十有八載。此邦之人。遭逢疾威。囂童噉音啍。劫衆阻兵。慄慄栗栗。若墜若覆。時維隴西公。受命作藩。爰自洛京。單車來臨。遂

草
卷之三
拯其危遂去其疵弗肅弗厲薰爲大和神應祥福五穀穰
熟旣庶而豐人力有餘監軍是咨司馬是謀乃作水門爲
邦之郭以固風氣以閑寇偷黃流渾渾飛閣渠渠因而飾
之匪爲觀遊天子之武維隴西公是布天子之文維隴西
公是宣河之沄沄源于崑崙天子萬祀公多受祉乃伐山
石刻之日月尚俾來者知作之所始

燕喜亭記

太原王弘中在連州與學佛人景常元慧游異日從二人
者行於其居之後丘荒之間上高而望得異處焉斬茅而
嘉樹列發石而清泉激輦糞壤燔榴棘却立而視之出者
突然成丘陷者呀然成谷窪音蛙者爲池而缺者爲洞若有

鬼神異物陰來相之。自是弘中與二人者晨往而夕忘歸焉。乃立屋以避風雨寒暑。旣成，愈請名之。其丘曰峽德之丘，蔽於古而顯於今，有峽之道也。其石谷曰謙受之谷。瀑曰振鷺之瀑，谷言德，瀑言容也。其土谷曰黃金之谷。瀑曰秩秩之瀑，谷言容，瀑言德也。洞曰寒居之洞，志其入時也。池曰君子之池，虛以鍾其美，盈以出其惡也。泉之源曰天澤之泉，出高而施下也。合而名之以屋曰燕喜之亭，取詩所謂魯侯燕喜者，頌也。於是州民之老聞而相與觀焉。曰：吾州之山水名天下，然而無與燕喜者比。經營於其側者相接也，而莫直其地。凡天作而地藏之，以遺其人乎？弘中自吏部郎貶秩而來，次其道途所經，自藍田入商洛，涉浙

韓文
卷之十三
一八
湍臨漢水。升峴首以望方城。出荆門。下岷江。過洞庭。上湘水。行衡山之下。繇郴踰嶺。緩狄所家。魚龍所宮。極幽遐瑰詭之觀。宜其於山水飫聞而馱見也。今其意乃若不足傳曰。智者樂水。仁者樂山。弘中之德。與其所好。可謂協矣。智以謀之。仁以居之。吾知其去是而羽儀於天朝也不遠矣。遂刻石以記。

徐泗豪三州節度掌書記廳石記

書記之任亦難矣。元戎整齊三軍之士。統理所部之眾。以鎮守邦國。贊天子施教化。而又外與賓客四鄰交。其朝覲聘問。慰薦祭祀。祈祝之文。與所部之政。三軍之號令。升黜凡文辭之事。皆出書記。非閎辨通敏兼人之才。莫宜居之。

然皆元戎自辟。然後命於天子。苟其帥之不文。則其所辟或不當。亦其理宜也。南陽公自御史大夫豪壽廬三州觀察使。授節移鎮徐州。歷十一年。而掌書記者三人。其一人曰高陽許孟容。入仕于王朝。今爲尚書禮部郎中。其一人曰京兆杜兼。今爲尚書禮部員外郎觀察判官。其一人隴西李博。自前鄉貢進士授秘書省校書郎。方爲之。南陽公文章稱天下。其所辟實所謂閎辨通敏兼人之才者也。後之人苟未知南陽公之文章。吾請觀於三君子。苟未知三君子之文章。吾請觀於南陽公。可知矣。蔚乎其相章。炳乎其相輝。志同而氣合。魚川泳而鳥雲飛也。愈樂是賓主之相得也。故請刻石以記之。而陷置于壁間。俾來者得以覽。

觀焉。

畫記

雜古今人物小畫共一卷。騎而立者五人。騎而被甲載兵立者十人。一人騎執大旗前立。騎而被甲載兵行且下牽者十人。騎且負者二人。騎執噐者二人。騎擁田犬者一人。騎而牽者二人。騎而驅者三人。執羈勒立者二人。騎而下倚馬臂隼而立者一人。騎而驅涉者二人。徒而驅牧者二人。坐而指使者一人。甲冑手弓矢鈇鉞植者七人。甲冑執幟植者十人。負者七人。偃寢休者二人。甲冑坐睡者一人。方涉者一人。坐而脫足者一人。寒附火者一人。雜執噐物役者八人。奉壺矢者一人。舍而具食者十有一人。挹且注

者四人。牛牽者二人。驢驅者四人。一人杖而負者。婦人以孺子載而可見者六人。載而上下者三人。孺子戲者九人。凡人之事三十有二。爲人大小百二十有三。而莫有同者焉。馬大者九匹。於馬之中。又有上者。下者。行者。牽者。涉者。陸者。翹者。顧者。鳴者。寢者。訛者。立者。人立者。齧者。飲者。溲者。陟者。降者。痒磨樹者。噓者。嗅者。喜相戲者。怒相踉齧者。秣者。騎者。驟者。走者。載服物者。載狐兔者。凡馬之事二十有七。爲馬大小八十有三。而莫有同者焉。牛大小十一頭。橐駝驢如橐駝之數。而加其一焉。隼一。犬。羊。狐。兔。麋。鹿。共三頭。三十。旃車三兩。雜兵器。弓。矢。旌。旗。刀。劒。矛。楯。弓。服。矢。房。甲。冑之屬。餅。盂。簋。筥。筐。篋。金。飲。食。服用之器。壺。矢。博。

韓文公集卷之十三
弈之具二百五十有一皆曲極其妙貞元甲戌年余在京師甚無事同居有獨孤生申叔者始得此畫而與余彈碁余幸勝而獲焉意甚惜之以爲非一工人之所能運思蓋藁集衆工人之所長耳雖白金不願易也明年出京師至河陽與二三客論畫品格因出而觀之座有趙侍御者君子人也見之戚然若有感然少而進曰噫余之手摸也亡之且二十年矣余少時常有志乎茲事得國本絕人事而摸得之遊閩中而喪焉居閑處獨時往來余懷也以其始爲之勞而夙好之篤也今雖遇之力不能爲已且命工人存其大都焉余旣甚愛之又感趙君之事因以贈之而記其人物之形狀與數而時觀之以自釋焉

藍田縣丞廳壁記

丞之職所以貳令於一邑無所不當問其下主簿尉主簿尉乃有分職丞位高而偏例以嫌不可否事文書行吏抱成案詣丞卷其前鉗以左手右手摘紙尾鴈鶩行以進平立睨丞曰當署丞涉筆占位署惟謹目吏問可不可吏曰得則退不敢略省漫不知何事官雖尊方勢反出主簿尉下諺數^{上聲}慢必曰丞至以相訾訾丞之設豈端使然哉博陵崔斯立種學績文以蓄其有泓涵演迤日大以肆貞元初挾其能戰藝於京師再進再屈於人元和初以前大理評事言得失黜官再轉而爲丞茲邑始至喟曰官無卑顧材不足塞職既噤不得施用又喟曰丞哉丞哉余不負丞

而丞負余則盡枿音藥去牙角一躡故跡破崖岸而爲之丞
廳故有記壞漏汚不可讀斯立易桶與瓦墁治壁悉書前
任人名氏庭有老槐四行南牆鉅竹千挺儼立若相持水
洑洑循除鳴斯立痛掃漑對樹二松日哦其間有問者輒
對曰余方有公事子姑去考功郎中知制誥韓愈記

新修滕王閣記

愈少時側聞江南多游觀之美而滕王閣獨爲第一有瑰
偉絕特之稱及得三王所爲序賦記等壯其文辭益欲往
一觀而讀之以忘吾憂繫官于朝願莫之遂十四年以言
事斥守揭陽便道取疾以至海上又不得過南昌而觀所
謂滕王閣者其冬以天子進大號加恩區內移刺袁州袁

於南昌爲屬邑私喜幸自語以爲當得躬詣大府受約束
於下執事及其無事且還僅得一至其處竊寄目償所願
焉至州之七月詔以中書舍人太原王公爲御史中丞觀
察江南西道洪江饒虔吉信撫袁悉屬治所八州之人前
所不便及所願欲而不得者公至之日皆罷行之大者驛
聞小者立變春生秋殺陽開陰閉令修於庭戶數日之間
而人自得於湖山千里之外吾雖欲出意見論利害聽命
於幕下而吾州乃無一事可假而行者又安得捨已所事
以勤館人則滕王閣又無因而至焉矣其歲九月人吏浹
和公與監軍使燕于此閣文武賓士皆與去聲在席酒半合
辭言曰此屋不修且壞前公爲從事此邦適理新之公所

爲文實書在壁。今三十年而公來爲邦伯。適及期月。公又來燕于此。公烏得無情哉。公應曰。諾。於是棟楹梁桷板檻之腐黑撓折者。蓋瓦級輓之破缺者。赤白之漫漶不鮮者。治之則已。無侈前人。無廢後觀。工旣訖。功公以衆飲。而以書命愈曰。子其爲我記之。愈旣以未得造觀爲歎。竊喜載名其上。詞列三王之次。有榮耀焉。乃不辭而承公命。其江山之好。登望之樂。雖老矣。如獲從公遊。尚能爲公賦之。元和十五年十月某日。袁州刺史韓愈記。

科斗書後記

愈叔父當大曆世。文辭獨行中朝。天下之欲銘述其先人功行。取信來世者。咸歸韓氏。於時李監陽冰獨能篆書。

而同姓叔父擇木善八分不問可知其人不如是者不稱
三服故三家傳子弟往來貞元中愈事董丞相幕府於汴
州識開封令服之者陽米子授余以其家科斗孝經漢衛
宏官書兩部合一卷愈寶蓄之而不暇學後來京師爲四
門博士識歸公歸公好古書能通之愈曰古書得其據依
蓋可講因進其所有書屬歸氏元和來愈亟不獲讓嗣爲
銘文薦道功德思凡爲文辭宜略識字因從歸公乞觀二
部書得之留月餘張籍令進士賀拔恕寫以留愈蓋得其
十四五而歸其書歸氏十一年六月四日右庶子韓愈記

韓文卷之十三終

卷之六

十四正而體其書體五十一 十六日四日本親于韓公

韓文卷之十四

雜著

鄆州谿堂詩

憲宗之十四年始定東平三分其地以華州刺史禮部尚書兼御史大夫扶風馬公爲鄆音運曹濮音卜節度觀察等使鎮其地旣一年褒其軍號曰天平軍上卽位之二年召公入且將用之以其人之安公也復歸之鎮上之三年公爲政於鄆曹濮也適四年矣治成制定衆志大固惡絕於心仁形於色轉音轉心一力以供國家之職于時沂密始分而殘其帥其後幽鎮魏不悅於政相肩繼變復歸於舊徐亦乘勢逐帥自置同於三方惟鄆也截然中居四鄰望之若

防之制水恃以無恐然而皆曰鄆爲虜巢且六十年將彊卒武曹濮於鄆州大而近軍所根柢皆驕以易怨而公承死亡之後掇拾之餘剝膚椎髓公私掃地赤立新舊不相保持萬目睽睽公於此時能安以治之其功爲大若幽鎮魏徐之亂不扇而變此功反小何也公之始至衆未熟化以武則忿以憾以恩則橫而肆一以爲赤子一以爲龍蛇憊心罷音疲精磨以歲月然後致之難也及教之行衆皆戴公爲親父母夫叛父母從仇讐非人之情故曰易於是天子以公爲尚書右僕射封扶風縣開國伯以褒嘉之公亦樂衆之和知人之悅而侈上之賜也於是爲堂於其居之西北隅號曰谿堂以饗士大夫通上下之志旣饗其從事

陳曾謂其衆言公之畜此邦其勤不亦至乎此邦之人纍
公之化惟所令之不亦順乎上勤下順遂濟登茲不亦休
乎昔者人謂斯何今者人謂斯何雖然斯堂之作意其有
謂而暗無詩歌是不考引公德而接邦人於道也乃使來
請其詩曰

帝奠九壘有葉有年有荒不條河岱之間及我憲考一收
正之視邦選侯以公來尸公來尸之人始未信公不飲食
以訓以徇孰饑無食孰呻孰歎孰冤不問不得分願孰爲
邦蠹節根之螟羊狼狼貪以口覆城吹之煦之摩手拊之
箴之石之膊音而磔之凡公四封旣富以彊謂公吾父孰
違公令可以師征不寧守邦公作谿堂播播流水淺有蒲

蓮深有蕰葦。公以賓燕。其鼓駭駭。公燕谿堂。賓校醉飽。流
有跳魚。岸有集鳥。既歌以舞。其鼓考考。公在谿堂。公御琴
瑟。公暨賓贊。稽經諏律。施去聲用不差。人用不屈。谿有蘋毗賓
切苽。孤音有龜有魚。公在中流。右詩左書。無我斃遺。此邦是
庥。

貓相乳

司徒北平王家。貓有生子同日者。其一死焉。有二子飲於
死母。母且死。其鳴咿咿。其一方乳其子。若聞之。起而若聽
之。走而若救之。銜其一。置於其棲。又往如之。反而乳之。若
其子然。噫亦異之大者也。夫貓人畜也。非性於仁義者也。
其感於所畜者乎哉。北平王牧人以康。伐罪以平。理陰陽。

以得其宜。國事旣畢。家道乃行。父父子子。兄兄弟弟。雍雍如也。愉愉如也。視外猶視中。一家猶一人。夫如是。其所感應召致。其亦可知矣。易曰。信及豚魚。非此類也。夫愈時獲幸於北平王。客有問王之德者。愈以是對。客曰。夫祿位貴富。人之所大欲也。得之之難。未若持之之難也。得之於功。或失於德。得之於身。或失於子孫。今夫功德如是。祥祉如是。其善持之也。可知已。旣已。因叙之爲貓相乳說云。

進士策問十三首

問。書稱汝則有大疑。謀及乃心。謀及卿士。以至于庶人。龜筮考其從違。以審吉凶。則是聖人之舉事。興爲無不與人共之者也。於易則又曰。君不密則失臣。臣不密則失身。幾

事不密則害成。而春秋亦有譏漏言之詞。如是則又似不與人共之。而獨運者。書與易春秋經也。聖人於是乎盡其心焉耳矣。今其妄相戾悖如此。欲人之無疑。不可得已。是二說者。其信有是非乎。抑所指各殊。而學者不之能察也。諒非深考古訓。讀聖人之書者。其何能辨之。此固吾子之所宜無讓者。願承教焉。

問古之人有云。夏之政尚忠。殷之政尚敬。而周之政尚文。是三者相循環終始。若五行之與四時焉。原其所以爲心。皆非故立殊而求異也。各適於時。救其弊而已矣。夏殷之書存者可見矣。至周之典籍咸在。考其文章。其所尚若不相遠然焉。所謂三者之異云乎。抑其道深微。不可究與。將

其詞隱而難知也。不然則是說爲謬矣。周之後秦漢蜀吳魏晉之興與霸亦有尚乎無也。觀其所爲其亦有意云爾。循環之說安在。吾子其無所隱焉。

問夫子之序帝王之書而繫以秦魯及次列國之風而宋魯獨稱頌焉。秦穆之德不踰於二霸。宋魯之君不賢乎齊晉。其位等其德同。升黜取捨如是之相遠。亦將有由乎。願聞所以辨之之說。

問夫子旣沒聖人之道不明。蓋有楊墨者始侵而亂之。其時天下咸化而從焉。孟子辭而闢之。則旣廓如也。今其書尚有存者。其道可推而知。不可乎。其所守者何事。其不合於道者幾何。孟子之所以辭而闢之者何說。今之學者有

學於彼者乎。有近於彼者乎。其已無傳乎。其無乃化而不
自知乎。其無傳也。則善矣。如其尚在。將何以救之乎。諸生
學聖人之道。必有能言是者。其無所爲讓。

問。所貴乎道者。不以其便於人而得於已乎。當周之衰。管
夷吾以其君霸。九合諸侯。一匡天下。戎狄以微。京師以尊。
四海之內。無不受其賜者。天下諸侯。奔走其政令之不暇。
而誰與爲敵。此豈非便於人而得於已乎。秦用商君之法。
人以富。國以彊。諸侯不敢抗。及七君而天下爲秦。使天下
爲秦者。商君也。而後代之稱道者。咸羞言管商。氏何哉。庸
非求其名而不責其實歟。願與諸生論之。無惑於舊說。
問。夫子之言。蓋各言爾志。又曰。居則曰。不吾知也。如或知

爾則何以哉。今之舉者，不本於鄉，不序于庠，一朝而羣至，
乎有司，有司之不之知也，宜矣。今將自州縣始，請各誦所
懷，聊以觀諸生之志。死者可作，其誰與歸？又曰：居是邦也，
事其大夫之賢者，友其士之仁者，敢問諸生之所事而友
者，爲誰乎？所謂賢而仁者，其事如何哉？言及之而不言，亦
君子之所不爲也。

問：春秋之時，百有餘國，皆有大夫士，詳於傳者，無國無賢
人焉。其餘皆足以充其位，不聞有無其人而闕其官者。春
秋之後，其書尤詳，以至于吳蜀魏下及晉氏之亂，國分如
錙銖，讀其書亦皆有人焉。今天下九州四海，其爲土地大
矣，國家之舉士，內有明經進士，外有方維大臣之薦，其餘

以門地勲力進者。又有倍於是其爲門戶多矣。而自御史臺尚書省。以至于中書門下省。咸不足其官。豈今之人不及於古之人邪。何求而不得也。夫子之言曰。十室之邑。必有忠信。如丘者焉。誠得忠信如聖人者。而委之以大臣宰相之事。有不可乎。況於百執事之微者哉。古之十室。必有任宰相大臣者。今之天下。而不足士大夫於朝。其亦有說乎。

問。夫子曰。潔淨精微。易教也。今習其書。不識四者之所謂。盍舉其義而陳其數焉。

問。易之說曰。乾健也。今考乾之爻。在初者曰。潛龍勿用。在三者曰。夕惕若厲。无咎。在四者亦曰。无咎。在上曰。有悔。卦

六位。一勿用。二苟得无咎。一有悔。安在其爲健乎。又曰。乾以易知。坤以簡能。乾之四位。旣不爲易矣。坤之爻。又曰。龍戰于野。戰之於事。其足爲簡乎。易六經也。學者之所宜用心。願施其詞。陳其義焉。

問。人之仰而生者。穀帛。穀帛豐無饑寒之患。然後可以行之於仁義之途。措之於安平之地。此愚智所同識也。今天下穀愈多。而帛愈賤。人愈困者。何也。耕者不多。而穀有餘。蠶者不多。而帛有餘。有餘宜足。而反不足。此其故又何也。將以救之。其說如何。

問。夫子言。堯舜垂衣裳。而天下理。又曰。無爲而理者。其舜也歟。書之說。堯曰。親九族。又曰。平章百姓。又曰。協和萬邦。

又曰。曆象日月星辰。敬授人時。又曰。洪水懷山襄陵。下人其咨。夫親九族。平百姓。和萬邦。則天道授人時。愁水禍。非無事也。而其言曰。垂衣裳而天下理者。何也。於舜則曰。慎五典。又曰。叙百揆。又曰。賓四門。又曰。齊七政。又曰。類上帝。禋六宗。望山川。徧羣神。又曰。協時月。正日。同律度量衡。五載一巡狩。又曰。分十二州。封山濬川。恤五刑。典三禮。彰施五色。出納五言。嗚呼。其何勤且煩如是。而其言曰。無爲而理者。何也。將亦有深辭隱義。不可曉邪。抑其年代已遠。失其傳邪。二三子其辨焉。

問。古之學者。必有師。所以通其業。成就其道德者也。由漢氏已來。師道日微。然猶時有授經傳業者。及于今。則無聞。

矣。德行若顏回，言語若子貢，政事若子路，文學若子游，猶且有師。非獨如此。雖孔子亦有師。問禮於老聃，問樂於萇。弘是也。今之人不及孔子，顏回遠矣。而且無師。然其不聞有業不通而道德不成者，何也？

問食粟衣帛，服仁行義，以俟死者，二帝三王之所守。聖人未之有改焉者也。今之說者，有神僊不死之道，不食粟，不衣帛，薄仁義以爲不足爲，是誠何道邪？聖人之於人，猶父母之於子，有其道而不以教之，不仁。其道雖有而未之知，不智。仁與智且不能，又烏足爲聖人乎？不然則說神僊者妄矣。

爭臣論

或問諫議大夫陽城於愈可以爲有道之士乎哉學廣而聞多不求聞於人也行古人之道居於晉之鄙晉之鄙人薰其德而善良者幾千人大臣聞而薦之天子以爲諫議大夫人皆以爲華陽子不色喜居於位五年矣視其德如在野彼豈以富貴移易其心哉愈應之曰是易所謂恒其德貞而夫子凶者也惡得爲有道之士乎哉在易蠱之上九云不事王侯高尚其事蹇之六二則曰王臣蹇蹇匪躬之故夫不以所居之時不一而所蹈之德不同也若蠱之上九居無用之地而致匪躬之節以蹇之六二在王臣之位而高不事之心則冒進之患生曠官之刺興志不可則而尤不終無也今陽子在位不爲不久矣聞天下之得失

不爲不熟矣。天子待之，不爲不加矣。而未嘗一言及於政。視政之得失，若越人視秦人之肥瘠，忽焉不加喜戚於其心。問其官，則曰諫議也。問其祿，則曰下大夫之秩也。聞其政，則曰我不知也。有道之士，固如是乎哉？且吾聞之，有官守者，不得其職，則去；有言責者，不得其言，則去。今陽子以爲得其言，豈乎哉？得其言而不言，與不得其言而不去，無一可者也。陽子將爲祿仕乎？古之人有云：仕不爲貧，而有時乎爲貧。謂祿仕者也。宜乎辭尊而居卑，辭富而居貧。若抱關擊柝者可也。蓋孔子嘗爲委吏矣，嘗爲乘田矣，亦不敢曠其職，必曰會計當而已矣。必曰牛羊遂而已矣。若陽子之秩祿，不爲卑且貧，章章明矣。而如此，其可乎哉？或曰：

否。非若此也。夫陽子惡訕上者。惡爲人臣招音翹其君之過。而以爲名者。故雖諫且議。使人不得而知焉。書曰。爾有嘉謀嘉猷。則入告爾后于內。爾乃順之于外。曰。斯謨斯猷。惟我后之德。夫陽子之用心。亦若此者。愈應之曰。若陽子之用心如此。滋所謂惑者矣。入則諫其君。出不使人知者。大臣宰相者之事。非陽子之所宜行也。夫陽子本以布衣隱於蓬蒿之下。主上嘉其行誼。擢在此位。官以諫爲名。誠宜有以奉其職。使四方後代知朝廷有直言骨鯁之臣。天子有不僭賞從諫如流之美。庶岩穴之士聞而慕之。束帶結髮。願進於闕下。而伸其辭說。致吾君於堯舜。熙鴻號於無窮也。若書所謂。則大臣宰相之事。非陽子之所宜行也。且

陽子之心將使君人者惡聞其過乎。是啓之也。或曰陽子之不求聞而人聞之不求用而君用之不得已而起守其道而不變何子過之深也。愈曰自古聖人賢士皆非有求於聞用也。閔其時之不平人之不义得其道不敢獨善其身而必以兼濟天下也。孜孜矻矻死而後已。故禹過家門不入孔席不暇煖而墨突不得黔彼三聖一賢者豈不知自安佚之爲樂哉。誠畏天命而悲人窮也。夫天授人以賢聖才能豈使自有餘而已。誠欲以補其不足者也。耳目之於身也耳司聞而目司見聽其是非視其險易然後身得安焉。聖賢者時人之耳目也。時人者聖賢之身也。且陽子之不賢則將役於賢以奉其上矣。若果賢則固畏天命而

閔人窮也。惡得以自暇逸乎哉？或曰：吾聞君子不欲加諸人，而惡許以爲直者。若吾子之論，直則直矣，無乃傷于德而費於辭乎？好盡言以招音翹人過。國武子之所以見殺於齊也，吾子其亦聞乎？愈曰：君子居其位，則思死其官；未得位，則思脩其辭以明其道。我將以明道也，非以爲直而加人也。且國武子不能得善人而好盡言於亂國，是以見殺。傳曰：惟善人能受盡言。謂其聞而能改之也。子告我曰：陽子可以爲有道之士也。今雖不能及已，陽子將不得爲善人乎哉？

改葬服議

經曰：改葬。總春秋穀梁傳亦曰：改葬之禮，總舉下緬也。此

皆謂子之於父母其他則皆無服何以識其必然經次五等之服小功之下然後著改葬之制更無輕重之差以此知惟記其最親者其他無服則不記也若主人當服斬衰其餘親各服其服則經亦言之不當惟云總也傳稱舉下緇者緇猶遠也下謂服之最輕者也以其遠故其服輕也江熙曰禮天子諸侯易服而葬以爲交於神明者不可以純凶況其緇者乎是故改葬之禮其服惟輕以此而言則亦明矣衛司徒文子改葬其叔父問服於子思子思曰禮父母改葬總旣葬而除之不忍無服送至親也非父母無服無服則弔服而加麻此又其著者也文子又曰喪服旣除然後乃葬則其服何服子思曰三年之喪未葬服不變

除何有焉。然則改葬與未葬者有異矣。古者諸侯五月而葬。大夫三月而葬。士逾月。無故未有過時而不葬者也。過時而不葬。謂之不能葬。春秋譏之。若有故而未葬。雖出三年。子之服不變。此孝子之所以著其情。先王之所以必其時之道也。雖有其文。未有著其人者。以是知其至少也。改葬者。爲山崩水涌毀其墓。及葬而禮不備者。若文王之葬王季。以水齧其墓。魯隱公之葬惠公。以有宋師。太子少。葬故有闕之類。是也。喪事有進而無退。有易以輕服。無加以重服。殯於堂。則謂之殯。瘞於野。則謂之葬。近代以來。事與古異。或游或仕。在千里之外。或子幼妻稚。而不能自還。甚者拘以陰陽畏忌。遂葬於其土。及其返葬也。遠者或至數

十年近者亦出三年其吉服而從於事也久矣又安可取
未葬不變服之例而反爲之重服歟在喪當葬猶宜易以
輕服況旣遠而反純凶以葬乎若果重服是所謂未可除
而除不當重而更重也或曰喪與其易也寧戚雖重服不
亦可乎曰不然易之與戚則易固不如戚矣雖然未若合
禮之爲懿也儉之與奢則儉固愈於奢矣雖然未若合禮
之爲懿也過猶不及其此類之謂乎或曰經稱改葬總而
不著其月數則似三月而後除也子思之對文子則曰旣
葬而除之今宜如何曰自啓殯至於旣葬而三月則除之
未三月則服以終三月也曰妻爲夫何如曰如子無弔服
而加麻則何如曰今之弔服猶古之弔服也

省試學生代齋郎議

齋郎職奉宗廟社稷之小事。蓋士之賤者也。執籩豆駿奔走。以役于其官之長。不以德進。不以言揚。蓋取其人力。以備其事而已矣。奉宗廟社稷之小事。執籩豆駿奔走。亦不可以不敬也。於是選大夫士之子弟。未爵命者。以塞員填闕。而教之行事。其勤雖小。其使之不可以不報也。必書其歲。歲既久矣。於是乎命之以官。而授之以事。其亦微矣哉。學生或以通經舉。或以能文稱。其微者。至於習法律。知字書。皆有以贊於教化。可以使令於上者也。自非天姿茂異。曠日經久。以所進業。發聞於鄉閭。稱道于朋友。薦於州府。而升之司業。則不可得而齒乎國學矣。然則奉宗廟社稷。

之小事。任力之小者也。贊於教化。可以使令於上者。德藝之大者也。其亦不可移易明矣。今議者謂學生之無所事。謂齋郎之幸而進。不本其意。因謂可以代任其事而罷之。蓋亦不得其理矣。今夫齋郎之所事者力也。學生之所事者德與藝也。以德藝舉之。而以力役之。是使君子而服小人之事。且非國家崇儒勸學誘人爲善之道也。此一說不可者也。抑又有大不可者焉。宗廟社稷之事。雖小。不可以不專敬之至也。古之道也。今若以學生兼其事。及其歲時日月。然後授其宗彛。盪洗其周旋。必不合度。其進退必不得宜。其思慮必不固。其容貌必不莊。此其無他。其事不習。而其志不專故也。非近於不敬者歟。又有大不可者。其是

之謂歟。若知此不可，將令學生恒掌其事，而隳壞其本業。則是學生之教加少，學生之道益貶，而齋郎之實猶在。齋郎之名苟無也，大凡制度之改，政令之變，利於其舊不什，則不可爲已。又況不如其舊哉？考之於古，則非訓稽之於今，則非利尋其名而求其實，則失其宜。故曰：議罷齋郎，而以學生薦享，亦不得其理矣。

禘祫議

右今月十六日敕旨，宜令百僚議限五日內聞奏者。將仕郎守國子監四門博士臣韓愈謹獻議曰：伏以陛下追孝祖宗，肅敬祀事，凡在擬議，不敢自專。聿求厥中，延訪羣下，然而禮文繁漫，所執各殊。自建中之初，迄至今歲，屢經禘

祫未合適從。臣生遭聖明，涵泳恩澤，雖賤不及議，而志切效忠。今輒先舉衆議之非，然後申明其說。一曰：獻懿廟主宜永藏之夾室。臣以爲不可。夫祫者合也。毀廟之主皆當合食於太祖。獻懿二祖卽毀廟主也。今雖藏於夾室，至禘祫之時，豈得不食於太廟乎？名曰合祭，而二祖不得祭焉。不可謂之合矣。二曰：獻懿廟主宜毀之。瘞之。臣又以爲不可。謹按禮記：天子立七廟，一壇一墠。其毀廟之主皆藏於祧廟。雖百代不毀。祫則陳於太廟而饗焉。自魏晉已降，始有毀瘞之議。事非經據，竟不可施行。今國家德厚流光，創立九廟，以周制推之。獻懿二祖猶在壇墠之位。况於毀瘞而不禘祫乎？三曰：獻懿廟主宜各遷於其陵所。臣又以爲

不可。二祖之祭於京師，列於太廟也。二百年矣。今一朝遷之，豈惟人聽疑惑，抑恐二祖之靈眷顧依遲，不卽饗於下國也。四曰：獻懿廟主宜附於興聖廟，而不禘祫。臣又以爲不可。傳曰：祭如在。景皇帝雖太祖，其於屬乃獻懿之子孫也。今欲正其子東向之位，廢其父之大祭，固不可爲典矣。五曰：獻懿二祖宜別立廟於京師。臣又以爲不可。夫禮有所降，情有所殺。是故去廟爲祧，去祧爲壇，去壇爲墀。去墀爲鬼漸，而之遠，其祭益稀。昔者魯立煬宮，春秋非之以爲不當取。已毀之廟，旣藏之主，而復築宮以祭，今之所議與此正同。又雖違禮立廟，至於禘祫也，合食則禘無其所，廢祭則於經不通。此五說者，皆所不可。故臣博采前聞，求其

折中。以爲殷祖玄王。周祖后稷。太祖之上。皆自爲帝。又其
代數已遠。不復祭之。故太祖得正東向之位。子孫從昭穆
之列。禮所稱者。蓋以紀一時之宜。非傳於後代之法也。傳
曰。子雖齊聖。不先父食。蓋言子爲父屈也。景皇帝雖太祖
也。其於獻懿。則子孫也。當禘祫之時。獻祖宜居東向之位。
景皇帝宜從昭穆之列。祖以孫尊。孫以祖屈。求之神道。豈
遠人情。又常祭甚衆。合祭甚寡。則是太祖所屈之祭。至少。
所伸之祭。至多。比於伸孫之尊。廢祖之祭。不亦順乎。事異
殷周。禮從而變。非所失禮也。臣伏以制禮作樂者。天子之
職也。陛下以臣議有可采。粗合天心。斷而行之。是則爲禮。
如以爲猶或可疑。乞召臣對面陳得失。庶有發明。謹議。

省試顏子不貳過論

論曰登孔氏之門者衆矣三千之徒四科之目孰非由聖人之道爲君子之儒者乎其於過行過言亦云鮮矣而夫子舉不貳過惟顏氏之子其何故哉請試論之夫聖人抱誠明之正性根中庸之至德苟發諸中形諸外者不惟思慮莫匪規矩不善之心無自入焉可擇之行無自加焉故惟聖人無過所謂過者非謂發於行彰於言人皆謂之過而後爲過也生于其心則爲過矣故顏子之過此類也不貳者蓋能止之於始萌絕之於未形不貳之於言行也中庸曰自誠明謂之性自明誠謂之教自誠明者不勉而中不思而得從容中道聖人也無過者也自明誠者擇善而

固執之者也不勉則不中不思則不得不貳過者也故夫子之言曰回之爲人也擇乎中庸得一善則拳拳服膺而不失之矣又曰顏氏之子其殆庶幾乎言猶未至也而孟子亦曰顏子具聖人之體而微者皆謂不能無生于其心而亦不暴之於外考之於聖人之道差爲過耳顏子自惟其若是也於是居陋巷以致其誠飲一瓢以求其志不以富貴妨其道不以隱約易其心確乎不拔浩然自守知高堅之可尚忘鑽仰之爲勞任重道遠竟莫之致是以夫子歎其不幸短命今也則亡謂其不能與已並立於至聖之域觀教化之大行也不然夫行發於身加於人言發乎邇見乎遠苟不慎也敗辱隨之而後思欲不貳過其於聖人

之道不亦遠乎。而夫子尚肯謂之其殆庶幾。孟子尚復謂之具體而微者哉。則顏子之不貳過者盡在是矣。謹論。

與李祕書論小功不稅書

曾子稱小功不稅。則是遠兄弟終無服也。而可乎。鄭玄注云。以情責情。今之士人遂引此。不追服小功。小功服最多。親則叔父之下殤。與適孫之下殤。與昆弟之下殤。尊則外祖父母。常服則從祖祖父母。禮沿人情。其不可不服也明矣。古之人行役不踰時。各相與處一國。其不追服雖不可。猶至少。今之人男出仕。女出嫁。或千里之外。家貧訃告不及時。則是不服小功者恒多。而服小功者恒鮮矣。君子之於骨肉死。則悲哀而爲之服者。豈牽於外哉。聞其死則悲。

哀豈有間於新故死哉。今特以訃告不及時聞死出其日數則不服其可乎。愈常怪此近出弔人見其顏色感感類有喪者而其服則吉。問之則云小功不稅者也。禮文殘缺師道不傳不識禮之所謂不稅果不追服乎。無乃別有所指而傳注者失其宗乎。伏惟兄道德純明躬行古道如此之類必經於心而有所決定不惜示及幸甚幸甚泥水馬弱不敢出不果鞠躬親問而以書悚息尤深愈再拜。

太學生何蕃傳

太學生何蕃入太學者廿餘年矣。歲舉進士學成行尊自大學諸生推頌不敢與蕃齒。相與言於助教博士助教博士以狀申於司業祭酒司業祭酒撰次蕃之羣行焯焯者

數十餘事以之升於禮部而以聞於天子京師諸生以薦
著名文說者不可選紀公卿大夫知蕃者比肩立莫爲禮
部爲禮部者率蕃所不合者以是無成功蕃淮南人父母具
全初入太學歲率一歸父母止之其後間一二歲乃一歸
又止之不歸者五歲矣蕃純孝人也閔親之老不自克一
日揖諸生歸養於和州諸生不能止乃閉蕃空舍中於是
太學六館之士百餘人又以蕃之義行言於司業陽先生
城請諭留蕃於是太學闕祭酒會陽先生出道州不果留
歐陽詹生言曰蕃仁勇人也或者曰蕃居太學諸生不爲
非義葬死者之無歸哀其孤而字焉惠之大小必以力復
斯其所謂仁歟蕃之力不任其體其貌不任其心吾不知

其勇也。歐陽詹生曰：朱泚之亂，太學諸生舉將從之，來請起蕃蕃，正色叱之。六館之士不從亂，茲非其勇歟？惜乎蕃之居下，其可以施於人者不流也。譬之水，其爲澤不爲川乎？川者高澤者卑，高者流卑者止，是故蕃之仁義充諸心，行諸太學，積者多，施者不遐也。天將雨水，氣上無擇於川澤澗谿之高下，然則澤之道其亦有施乎？抑有待於彼者歟？故凡貧賤之士，必有待，然後能有所立，獨何蕃歟？吾是以言之，無亦使其無傳焉。

荅張籍書

愈始者望見吾子於衆人之中，固有異焉。及聆其音聲，接其辭氣，則有願交之志。因緣幸會，遂得所圖，豈惟吾子之

不遺抑僕之所遇有時焉耳近者嘗有意吾子之闕焉無
言意僕所以交之之道不至也今乃大得所圖脫然若沈
痾去體灑然若執熱者之濯清風也然吾子所論排釋老
不若著書囂囂多言徒相爲訾若僕之見則有異乎此也
夫所謂著書者義止於辭耳宣之於口書之於簡何擇焉
孟軻之書非軻自著軻旣歿其徒萬章公孫丑相與記軻
所言焉耳僕自得聖人之道而誦之排前二家有年矣不
知者以僕爲好辯也然從而化者亦有矣聞而疑者又有
倍焉頑然不入者親以言諭之不入則其觀吾書也固將
無得矣爲此而止吾豈有愛於力乎哉然有一說化當世
莫若口傳來世莫若書又懼吾力之未至也三十而立四

十而不惑。吾於聖人既過之。猶懼不及矧。今未至。固有所未至耳。請待五六十。然後爲之。冀其少過也。吾子又譏吾與人人爲無實。駁雜之說。此吾所以爲戲耳。比之酒色。不有間乎。吾子譏之。似同浴而譏裸程也。若商論不能下氣。或似有之。當更思而悔之耳。博塞之譏。敢不承教。其他俟相見。薄晚須到公府。言不能盡。愈再拜。

重答張籍書

吾子不以愈無似。意欲推而納諸聖賢之域。拂其邪心。增其所未高。謂愈之質有可以至於道者。浚其源。導其所歸。漑其根。將食其實。此盛德者之所辭讓。況於愈者哉。抑其中有宜復者。故不可遂已。昔者聖人之作春秋也。既深其

文辭矣。然猶不敢公傳道之。口授弟子。至於後世。然後其書出焉。其所以慮患之道微也。今天二氏之所宗而事之者。下乃公卿輔相。吾豈敢昌言排之哉。擇其可語者。誨之。猶時與吾悖。其聲噍噍。若遂成其書。則見而怒之者必多矣。必且以我爲狂爲惑。其身之不能恤。書於吾何有。夫子聖人也。且曰。自吾得子路。而惡聲不入於耳。其餘輔而相者。周天下。猶且絕糧於陳。畏於匡。毀於叔孫。奔走於齊魯。宋衛之郊。其道雖尊。其窮也亦甚矣。賴其徒相與守之。卒有立於天下。向使獨言之。而獨書之。其存也可冀乎。今夫二氏行乎中土也。蓋六百年有餘矣。其植根固。其流波漫。非所以朝令而夕禁也。自文王沒。武王周公成康相與守。

之禮樂皆在。及乎夫子。未久也。自夫子而及乎孟子。未久也。自孟子而及乎揚雄。亦未久也。然猶其勤若此。其困若此。而後能有所立。吾其可易而爲之哉。其爲也易。則其傳也不遠。故余所以不敢也。然觀古人得其時。行其道。則無所爲書。爲書者皆所爲不行乎今。而行乎後世者也。今吾之得吾志。失吾志。未可知。竢五六十爲之。未失也。天不欲使茲人有知乎。則吾之命不可期。如使茲人有知乎。非我其誰哉。其行道其爲書。其化今其傳後。必有在矣。吾子其何遽戚戚於吾所爲哉。前書謂吾與人商論。不能下氣。若好勝者然。雖誠有之。抑非好已勝也好已之道勝也。非好已之道勝也已之道。乃夫子孟軻揚雄所傳之道也。若不勝

則無以爲道。吾豈敢避是名哉。夫子之言曰。吾與回言終日不違如愚。則其與衆人辯也有矣。駁雜之譏。前書盡之。吾子其復之。昔者夫子猶有所戲。詩不云乎。善戲謔兮。不爲虐兮。記曰。張而不弛。文武不能也。惡害於道哉。吾子其未之思乎。孟君將有所適。思與吾子別。庶幾一來。愈再拜。

韓文卷之十四終

韓文卷之十五

書

與孟東野書

與足下別久矣。以吾心之思足下，知足下懸懸於吾也。各
以事牽，不可合併。其於人人，非足下之爲見，而日與之處，
足下知吾心樂否也？吾言之，而聽者誰歟？吾唱之，而和者
誰歟？言無聽也，唱無和也。獨行而無徒也，是非無所與同
也。足下知吾心樂否也？足下才高氣清，行古道，處今世，無
田而衣食，事親左右，無違。足下之用心勤矣。足下之處身
勞且苦矣。混混與世相濁，獨其心追古人而從之。足下之
道，其使吾悲也。去年春脫汴州之亂，幸不死，無所與歸。遂

來于此。主人與吾有故。哀其窮。居吾于符離。睢上。及秋將
辭去。因被留以職事。默默在此行一年矣。到今年秋。聊復
辭去。江湖余樂也。與足下終幸矣。李習之娶吾亡兄之女。
期在後月。朝夕當來此。張籍在和州。居喪家甚貧。恐足下
不知。故具此白。冀足下一來相視也。自彼至此。雖遠。要皆
舟行可至。速圖之。吾之望也。春且盡。時氣向熱。惟侍奉吉
慶。愈眼疾。比劇甚。無聊。不復一一。愈再拜。

答竇秀才書

愈白。愈少驚怯於他藝能。自度無可努力。又不通時事。而
與世多齟齬。念終無以樹立。遂發憤篤專於文學。學不得
其術。凡所辛苦而僅有之者。皆符於空言。而不適於實用。

又重以自廢。是故學成而道益窮。年老而智愈困。今又以罪黜於朝廷。遠宰蠻縣。愁憂無聊。瘴癘侵加。喘喘而無以冀朝夕。足下年少才俊。辭雅而氣銳。當朝廷求賢如不及之時。當道者又皆良有司。操數寸之管。書盈尺之紙。高可以釣爵位。循序而進。亦不失萬一於甲科。今乃乘不測之舟。入無入之地。以相從問文章爲事。身勤而事左。辭重而情約。非計之得也。雖使古之君子。積道藏德。遁其光而不曜。膠其口而不傳者。遇足下之請。懇懇猶將倒廩傾囷。羅列而進也。若愈之愚不肖。又安敢有愛於左右哉。顧足下之能。足以自奮。愈之所有。如前所陳。是以臨事愧耻而不敢答也。錢財不足以賄左右之匱急。文章不足以發足下

之事業。糴載而往。垂橐而歸。足下亮之而已。愈白。

上李尚書書

月日。將仕郎前守四門博士韓愈。謹載拜奉書尚書大尹閣下。愈來京師。於今十五年。所見公卿大臣。不可勝數。皆能守官奉職。無過失而已。未見有赤心事上。憂國如家。如閤下者。今年已來。不雨者百有餘日。種不入土。野無青草。而盜賊不敢起。穀價不敢貴。百坊百二十司。六軍二十四縣之人。皆若閤下親臨其家。老姦宿賊。銷縮摧沮。覓亡魄喪。影滅跡絕。非閤下條理鎮服。布宣天子威德。其何能及此。愈也。少從事於文學。見有忠於君。孝於親者。雖在千百年之前。猶敬而慕之。况親逢閤下。得不候於左右。以求效。

其懇懇謹獻所爲文兩卷凡十五篇非敢以爲文也以爲謁見之資也進退惟命愈恐懼再拜

賀徐州張僕射白兔書

伏聞今月五日營田巡官陳從政獻瑞兔毛質皦白天馴其心其始實得之符離安阜屯屯之役夫朝行遇之迫之弗逸人立而拱竊惟休咎之兆天所以啓覺于下依類託喻事之纖悉不可圖驗非睿智博通孰克究明愈雖不敏請試辨之兎陰類也又窟居狡而伏逆象也今白其色絕其羣也馴其心化我德也人立而拱非禽獸之事革而從人且服罪也得之符離符離實我國名又附麗也不在農夫之田而在軍田武德行也不戰而來之道也有安阜

之嘉名焉。伏惟閣下股肱帝室，藩垣天下，四方其有逆亂之臣，未血斧鑕之屬，畏威崩析，歸我乎哉！其事兆矣，是宜具跡表聞，以承答天意。小子不惠，猥以文句微識蒙念，睹茲盛美，焉敢避不讓之責，而默默耶？愈再拜。

上兵部李侍郎書

十二月九日，將仕郎守江陵府法曹參軍韓愈謹上書侍郎閣下。愈少鄙鈍，於時事都不通曉，家貧不足以自活，應舉覓官，凡二十年矣。薄命不幸，動遭讒謗，進寸退尺，卒無所成。性本好文學，因困厄悲愁，無所告語，遂得究窮於經傳、史記、百家之說，沈潛乎訓義，反復乎句讀，礱磨乎事業，而奮發乎文章。凡自唐虞已來，編簡所存，大之爲河海，高

之爲山嶽。明之爲日月。幽之爲鬼神。纖之爲珠璣。華實變
之爲雷霆風雨。奇辭奧旨。靡不通達。惟是鄙鈍不通。曉於
時事。學成而道益窮。年老而智益困。私自憐悼。悔其初心。
髮禿齒豁。不見知己。夫牛角之歌。辭鄙而義拙。堂下之言。
不書於傳記。齊桓舉以相國。叔向攜手以上。然則非言之
難爲。聽而識之者難遇也。伏以閣下內仁而外義。行高而
德鉅。尚賢而與能。哀窮而悼屈。自江而西。旣化而行矣。今
者入守內職。爲朝廷大臣。當天子新即位。汲汲於理化之
日。出言舉事。宜必施設。旣有聽之之明。又有振之之力。甯
戚之歌。發明之言。不發於左右。則後而失其時矣。謹獻舊
文一卷。扶樹教道。有所明白。南行詩一卷。舒憂娛悲。雜以

韓文
卷之五
四
環怪之言。時俗之好。所以諷於口而聽於耳也。如賜覽觀。亦有可采。干黷嚴尊。伏增惶恐。愈再拜。

答尉遲生書

愈白。尉遲生足下。夫所謂文者。必有諸其中。是故君子慎其實。實之美惡。其發也不揜。本深而未茂。形大而聲宏。行峻而言厲。心醇而氣和。昭晰者無疑。優游者有餘。體不備不可以爲成人。辭不足不可以爲成文。愈之所聞者如是。有問於愈者。亦以是對。今吾子所爲皆善矣。謙謙然若不足。而以徵於愈。愈又敢有愛於言乎。抑所能言者。皆古之道。古之道不足以取於今。吾子何其愛之異也。賢公卿大夫。在上比肩。始進之賢士。在下比肩。彼其得之。必有以取。

之也。子欲仕乎？其往問焉，皆可學也。若獨有愛於是而非仕之謂，則愈也。嘗學之矣，請繼今以言。

答楊子書

辱書并示表記述書辭等五篇。比於東都，略見顏色，未得接言語。心固已相竒，但不敢果於貌定。知人堯舜所難，又嘗服宰予之誡，故未敢決然決，亦不敢忽然忘也。到城已來，不多與人還往。友朋之中，所敬信者，平昌孟東野、東野吃吃、說足下不離口。崔大敦詩不多見，每每說人物，亦以足下爲處子之秀。近又得李七翱書，亦云足下之文遠其兄甚矣。夫以平昌之賢，其言一人固足信矣。况又崔與李繼至而交說邪？故不待相見，相信已熟。旣相見，不要約已相

親審知足下之才充其容也。今辱書乃云云。是所謂以黃金注重外而內惑也。然恐足下少年與僕老者不相類。尚須驗以言。故具白。所以而今而後不置疑於其間可也。若曰長育人才。則有天子之大臣在。若僕者。守一官且不足以修理。況如是重任邪。學問有暇。幸時見臨。愈白。

至鄧州北寄上襄陽于相公書

伏蒙示文武順聖樂辭。天保樂詩。讀蔡琰胡笳辭詩。移族從并與京兆書。自幕府至鄧之北境。凡五百餘里。自庚子至甲辰。凡五日。手披目視。口誅其言。心惟其義。且恐且懼。忽若有亡。不知鞍馬之勤。道途之遠也。夫澗谷之水。深不過咫尺。丘垤之山高。不能踰尋丈。人則狎而翫之。及至臨

泰山之懸崖窺巨海之驚瀾莫不戰掉悼慄眩惑而自失
所觀變於前所守易於內亦其理宜也閣下負超卓之奇
材蓄雄剛之俊德渾然天成無有畔岸而又貴窮乎公相
威動乎區極天子之毗諸侯之師故其文章言語與事相
侔憚赫若雷霆浩汗若河漢正聲諧韶濩勁氣沮金石豐
而不餘一言約而不失一辭其事信其理切孔子之言曰
有德者必有言信乎其有德且有言也楊子雲曰商書灝
灝爾周書噩噩爾信乎其能灝灝而且噩噩也昔者齊君
行而失道管子請釋老馬而隨之樊遲請學稼孔子使問
之老農夫馬之智不賢於夷吾農之能不聖於尼父然且
云爾者聖賢之能多農馬之知專故也今愈雖愚且賤其

從事於文實專且久則其贊王公之能而稱大君子之美不爲僭越也伏惟詳察愈恐懼再拜

爲分司郎官上鄭尚書相公啓

愈啓伏蒙仁恩猥賜示問感戴戰悚若無所容措然尚有厥誠須盡露於左右者敢避其煩黷懷不滿之意於受恩之地哉愈幸甚三得爲屬吏朝夕不離門下出入五年竊自計較受與報不宜在門下諸從事後故事有當言未嘗敢不言有不便於已輒吐私情閣下所宜憐也分司郎官職事惟祠部爲煩且重愈獨判二年日與宦者爲敵相伺候罪過惡言詈辭狼藉公牒不敢爲耻實慮陷禍故前者懷狀乞與諸郎官更判意雖甚專事似率爾言語精神不

能自明。不蒙察允。遽以慙歸。僊俛日日。遂踰累旬。私圖其宜。敢以病告。鳴鳩平均。歌於國風。從事獨賢。雅以怨刺。伏惟俯加憐察。幸甚幸甚。愈再拜。

爲河南令上留守鄭相公啓

愈啓。愈爲相公官屬五年。辱知辱愛。伏念曾無絲毫事。爲報答效。日夜思慮。謀畫以爲事。大君子當以道。不宜苟且求容悅。故於事未嘗敢疑惑。宜行則行。宜止則止。受容受察。不復進謝。自以爲如此。眞得事大君子之道。今雖蒙沙汰爲縣。固猶在相公治下。未同去離門牆。爲故吏。爲形跡嫌疑。改前所爲。以自疎外於大君子。固當不待煩說於左右。而後察也。人有告人辱罵其妹與妻。爲其長者。得不追

而問之乎。追而不至。爲其長者。得不怒而杖之乎。坐軍營。操兵守禦。爲留守出入。前後驅從者。此眞爲軍人矣。坐坊市賣餅。又稱軍人。則誰非軍人也。愚以爲此必姦人。以錢財賂將吏。盜相公文牒。竊注名姓於軍籍中。以陵駕府縣。此固相公所欲去。奉法吏所當嫉。雖捕繫杖之。未過也。昨聞相公追捕所告受辱罵者。愚以爲大君子爲政。當有權變。始似小異。要歸於正耳。軍吏紛紛入見告屈。爲其長者安得不小致爲之之意乎。未敢以此仰疑大君子。及見諸從事說。則與小人所望信者。少似乖戾。雖然。豈敢生疑於萬一。必諸從事與諸將吏。未能去朋黨心。蓋覆黥鳥敢黥切。徒敢不以真情狀白露左右。小人受私恩良久。安敢閉蓄切。

以爲私恨。不一二陳道。伏惟相公憐察。幸甚幸甚。愈無適
時才用。漸不喜爲吏。得一事爲名。可自罷去。不啻如棄涕
唾。無一分顧藉心。故失大君子纖芥意。如丘山重守官去
官。惟今日指揮。愈惶懼再拜。

韓文卷之十五終

卓文卷之十五終

卓文卷之十五終

韓文卷之十六

書

上宰相書

正月二十七日。前鄉貢進士韓愈謹伏光範門下。再拜獻書相公閣下。詩之序曰。菁菁者莪。樂育材也。君子能長育人材。則天下喜樂之矣。其詩曰。菁菁者莪。在彼中阿。既見君子。樂且有儀。說者曰。菁菁者盛也。我微草也。阿。大陵也。言君子之長育人材。若大陵之長育微草。能使之菁菁然盛也。既見君子。樂且有儀云者。天下美之之辭也。其三章曰。既見君子。錫我百朋。說者曰。百朋多之之辭也。言君子既長育人材。又當爵命之。賜之厚祿。以寵貴之云爾。其卒

章曰汎汎楊舟載沈載浮。旣見君子我心則休。說者曰載者舟也。沈浮者物也。言君子之於人才無所不取。若舟之於物。浮沈皆載之云爾。旣見君子我心則休云者。言若此則天下之心美之也。君子之於人也旣長育之又當爵命寵貴之。而於其才無所遺焉。孟子曰君子有三樂。王天下不與存焉。其一曰樂得天下之英才而教育之。此皆聖人賢士之所極言至論。古今之所宜法者也。然則孰能長育天下之人材。將非吾君與吾相乎。孰能教育天下之英才。將非吾君與吾相乎。幸今天下無事。小大之官各守其職。錢穀甲兵之問不至於廟堂。論道經邦之暇。捨此宜無大者焉。今有人生二十八年矣。名不著於農工商賈之版。其業

則讀書著文歌頌堯舜之道。鷄鳴而起孜孜焉。亦不爲利。其所讀皆聖人之書。楊墨釋老之學。無所入於其心。其所著皆約六經之旨而成文。抑邪與正。辨時俗之所惑。居窮守約。亦時有感激怨懟竒怪之辭。以求知於天下。亦不悖於教化。妖淫諛佞。音張之說。無所出於其中。四舉於禮部。乃一得。三選於吏部。卒無成。九品之位。其可望。一畝之宮。其可懷。遑遑乎四海無所歸。恤恤乎饑不得食。寒不得衣。濱於死而益固。得其所者。爭笑之。忽將棄其舊而新。是圖求老農老圃而爲師。悼本志之變化。中夜涕泗交頤。雖不足當詩人孟子之謂。抑長育之使成材。其亦可矣。教育之使成才。其亦可矣。抑又聞古之君子相其君也。一夫不

獲其所。若已推而內之溝中。今有人生七年而學聖人之道。以修其身。積二十年。不得已。一朝而毀之。是亦不獲其所矣。伏念今有仁人在上位。若不往告之而遂行。是果於自棄。而不以古之君子之道待吾相也。其可乎。寧往告焉。若不得志。則命也。其亦行矣。洪範曰。凡厥庶民。有猷。有爲。有守。汝則念之。不協于極。不罹于咎。皇則受之。而康而色。曰。予攸好德。汝則錫之福。是皆與善之辭也。抑又聞古之人有自進者。而君子不逆之矣。曰。予攸好德。汝則錫之福。之謂也。抑又聞上之設官制祿。必求其人。而授之者。非苟慕其才。而富貴其身也。蓋將用其能。理不能。用其明。理不明者耳。下之修己立誠。必求其位而居之者。非苟沒於利。

而榮於名也。蓋將推已之所餘以濟其不足者耳。然則上之於求人，下之於求位，交相求而一其致焉耳。苟以是而爲心，則上之道不必難其下，下之道不必難其上，可舉而舉焉，不必讓其自舉也。可進而進焉，不必廡於自進也。抑又聞上之化下，得其道則勸賞不必徧加乎天下，而天下從焉；囚人之所欲爲而遂推之之謂也。今天下不由吏部而仕進者幾希矣。主上感傷山林之士有逸遺者，屢詔內外之臣旁求於四海，而其至者蓋闕焉。豈其無人乎哉？亦見國家不以非常之道禮之而不來耳。彼之處隱就閒者亦人耳。其耳目鼻口之所欲，其心之所樂，其體之所安，豈有異於人乎哉？今所以惡衣食窮體膚麋鹿之與處，援狁

之與居。固自以其身不能與時從順俯仰。故甘心自絕。而不悔焉。而方聞國家之仕進者。必舉於州縣。然後升於禮部吏部。試之以繡繪雕琢之文。考之以聲勢之逆順。章句之短長。中其程式者。然後得從下士之列。雖有化俗之方。安邊之畫。不繇是而稍進。萬不有一得焉。彼惟恐入山之不深。入林之不密。其影響昧昧。惟恐聞於人也。今若聞有以書進宰相而求仕者。而宰相不辱焉。而薦之天子。而爵命之。而布其書於四方。枯槁沈溺。閤寬通之士。必且洋洋焉。動其心。峩峩焉。纓其冠。于于焉。而來矣。此所謂勸賞不必徧加乎天下。而天下從焉者也。因人之所欲爲。而遂推之之謂者也。伏惟覽詩書孟子之所指。念育才錫福之

所以考古之君子相其君之道而忘自進自舉之罪思設官制祿之故以誘致山林逸遺之士庶天下之行道者知所歸焉小子不敢自幸其嘗所著文輒採其可者若干首錄在異卷冀辱賜觀焉干黷尊嚴伏地待罪愈再拜

後十九日復上書

二月十六日前鄉貢進士韓愈謹再拜言相公閣下向上書及所著文後待命凡十有九日不得命恐懼不敢逃遁不知所爲乃復敢自納於不測之誅以求畢其說而請命於左右愈聞之蹈水火者之求免於人也不惟其父兄子弟之慈愛然後呼而望之也將有介於其側者雖其所憎怨苟不至乎欲其死者則將大其聲疾呼而望其仁之也

之與居。固自以其身不能與時從順俯仰。故甘心自絕而
不悔焉。而方聞國家之仕進者。必舉於州縣。然後升於禮
部吏部。試之以繡繪雕琢之文。考之以聲勢之逆順。章句
之短長。中其程式者。然後得從下士之列。雖有化俗之方。
安邊之畫。不繇是而稍進。萬不有一得焉。彼惟恐入山之
不深。入林之不密。其影響昧昧。惟恐聞於人也。今若聞有
以書進宰相而求仕者。而宰相不辱焉。而薦之天子。而爵
命之。而布其書於四方。枯槁沈溺。閤寬通之士。必且洋
洋焉動其心。戔戔焉纓其冠于于焉而來矣。此所謂勸賞
不必徧加乎天下。而天下從焉者也。因人之所欲爲而遂
推之。之謂者也。伏惟覽詩書孟子之所指。念育才錫福之

所以考古之君子相其君之道而忘自進自舉之罪思設官制祿之故以誘致山林逸遺之士庶天下之行道者知所歸焉小子不敢自幸其嘗所著文輒採其可者若干首錄在異卷冀辱賜觀焉干黷尊嚴伏地待罪愈再拜

後十九日復上書

二月十六日前鄉貢進士韓愈謹再拜言相公閣下向上書及所著文後待命凡十有九日不得命恐懼不敢逃遁不知所爲乃復敢自納於不測之誅以求畢其說而請命於左右愈聞之蹈水火者之求免於人也不惟其父兄子弟之慈愛然後呼而望之也將有介於其側者雖其所憎怨苟不至乎欲其死者則將大其聲疾呼而望其仁之也

彼介於其側者聞其聲而見其事不惟其父兄子弟之慈愛然後往而全之也雖有所憎怨苟不至乎欲其死者則將狂奔盡氣濡手足焦毛髮救之而不辭也若是者何哉其勢誠急而其情誠可悲也愈之彊學力行有年矣愚不惟道之險夷行且不息以蹈於窮餓之水火其旣危且亟矣大其聲而疾呼矣閤下其亦聞而見之矣其將往而全之歟抑將安而不救歟有來言於閤下者曰有觀溺於水而焚於火者有可救之道而終莫之救也閤下且以爲仁人乎哉不然若愈者亦君子之所宜動心者也或謂愈子言則然矣宰相則知子矣如時不可何愈竊謂之不知言者誠其材能不足當吾賢相之舉耳若所謂時者固在上

位者之爲耳。非天之所爲也。前五六年時。宰相薦聞。尚有自布衣蒙抽擢者。與今豈異時哉。且今節度觀察使及防禦營田諸小使等。尚得自舉判官。無間於已仕未仕者。況在宰相。吾君所尊敬者。而曰不可乎。古之進人者。或取於盜。或舉於管庫。今布衣雖賤。猶足以方於此。情隘辭慙。不知所裁。亦惟少垂憐焉。愈再拜。

後廿九日復上書

三月十六日。前鄉貢進士韓愈。謹再拜言。相公閣下。愈聞周公之爲輔相。其急於見賢也。方一食。三吐其哺。方一沐。三捉其髮。當是時。天下之賢才。皆已舉用。姦邪讒佞欺負之徒。皆已除去。四海皆已無虞。九夷八蠻之在荒服之外。

者皆已賓貢。天災時變，昆蟲草木之妖，皆已銷息。天下之所謂禮樂刑政教化之具，皆已脩理。風俗皆已敦厚，動植之物，風雨霜露之所需被者，皆已得宜。休徵嘉瑞，麟鳳龜龍之屬，皆已備至。而周公以聖人之才，憑叔父之親，其所輔理承化之功，又盡章章如是。其所求進見之士，豈復有賢於周公者哉？不惟不賢於周公而已，豈復有賢於時百執事者哉？豈復有所計議能補於周公之化者哉？然而周公求之如此其急，惟恐耳目有所不聞見，思慮有所未及，以負成王託周公之意，不得於天下之心，如周公之心，設使其時輔理承化之功，未盡章章如是，而非聖人之才，而無叔父之親，則將不暇食與沐矣。豈特吐哺捉髮爲勤而

止哉。維其如是。故于今頌成王之德。而稱周公之功不衰。
今閤下爲輔相。亦近耳。天下之賢才。豈盡舉用。姦邪讒佞。
欺負之徒。豈盡除去。四海豈盡無虞。九夷八蠻之在荒服。
之外者。豈盡賓貢。天災時變。昆蟲草木之妖。豈盡銷息。天
下之所謂禮樂刑政教化之具。豈盡脩理。風俗豈盡敦厚。
動植之物。風雨霜露之所霑被者。豈盡得宜。休徵嘉瑞麟
鳳龜龍之屬。豈盡備至。其所求進見之士。雖不足以希望
盛德。至比於百執事。豈盡出其下哉。其所稱說。豈盡無所
補哉。今雖不能如周公吐哺捉髮。亦宜引而進之。察其所
以而去就之。不宜默默而已也。愈之待命四十餘日矣。書
再上而志不得通。足三及門。而閤人辭焉。惟其昏愚不知

韓文
卷之二十一
逃遁故復有周公之說焉。閤下其亦察之。古之士三月不仕則相弔。故出疆必載質。然所以重於自進者。以其於周不可。則去之魯。於魯不可。則去之齊。於齊不可。則去之宋。之鄭。之秦。之楚也。今天下一君四海一國。舍乎此。則夷狄矣。去父母之邦矣。故士之行道者。不得於朝。則山林而已矣。山林者。士之所獨善自養。而不憂天下者之所能安也。如有憂天下之心。則不能矣。故愈每自進。而不知愧焉。書亟上足數及門。而不知止焉。寧獨如此而已。惴惴焉。惟不得出大賢之門。下是懼。亦惟少垂察焉。瀆冒威尊。惶恐無已。愈再拜。

答侯繼書

裴子自城來得足下一書明日又於崔大處得足下陝州
所留書翫而復之不能自休尋知足下不得留僕又爲考
官所辱欲致一書開足下并自舒其所懷含意連辭將發
復已卒不能成就其說及得足下一書凡僕之所欲進於
左右者足下皆以自得之僕雖欲重累其辭諒無居足下
之意外者故絕意不爲行自念方當遠去潛深伏音與
時世不相聞雖足下之思我無所窺尋其聲光故不得不
有書爲別非復有所感發也僕少好學問自五經之外百
氏之書未有聞而不求得而不觀者然其所志惟在其意
義所歸至於禮樂之名數陰陽土地星辰方藥之書未嘗
一得其門戶雖今之仕進者不要此道然古之人未有不

通此而能爲大賢君子者。僕雖庸愚。每讀書輒用自愧。今幸不爲時所用。無朝夕役役之勞。將試學焉。力不足而後止。猶將愈於汲汲於時俗之所爭。旣不得而怨天尤人者。此吾今之志也。懼足下以吾退歸。因謂我不復能自彊不息。故因書奉曉。冀足下知吾之退。未始不爲進而衆人之進。未始不爲退也。旣貨馬。即求船東下。二事皆不過後月十日。有相問者。爲我謝焉。

答崔立之書

斯立足下。僕見險不能止。動不得時。顛頓狼狽。失其所操。持困不知變。以至辱於再三。君子小人之所憫笑。天下之所背而馳者也。足下猶復以爲可教。貶損道德。乃至手筆

以問之。扳援古昔。辭義高遠。且進且勸。足下之於故舊之
道得矣。雖僕亦固望於吾子。不敢望於他人者耳。然尚有
似不相曉者。非故欲發余乎。不然何子之不以丈夫期我
也。不能默默。聊復自明。僕始年十六七時。未知人事。讀聖
人之書。以爲人之仕者。皆爲人耳。非有利乎已也。及年二
十時。苦家貧衣食不足。謀於所親。然後知仕之不唯爲人
耳。及來京師。見有舉進士者。人多貴之。僕誠樂之。就求其
術。或出禮部所試賦詩策等以相示。僕以爲可無學而能。
因詣州縣求舉。有司者好惡出於其心。四舉而後有成。亦
未即得仕。聞吏部有以博學宏辭選者。人尤謂之才。且得
美仕。就求其術。或出所試文章。亦禮部之類。私怪其故。然

韓
猶樂其名。因又詣州府求舉。凡二試於吏部。一旣得之。而
又黜於中書。雖不得仕。人或謂之能焉。退自取所試讀之。
乃類於俳優者之辭。顏忸怩而心不寧者數月。旣已爲之。
則欲有所成就。書所謂耻過作非者也。因復求舉。亦無幸
焉。乃復自疑。以爲所試與得之者不同。其程度及得觀之。
余亦無甚愧焉。夫所謂博學者。豈今之所謂者乎。夫所謂
宏辭者。豈今之所謂者乎。誠使古之豪傑之士。若屈原孟
軻司馬遷相如揚雄之徒。進于是選。必知其懷慙。乃不自
進而已耳。設使與夫今之善進取者。競於蒙昧之中。僕必
知其辱焉。然彼五子者。且使生於今之世。其道雖不顯於
天下。其自負何如哉。肯與夫斗筭者。決得失於一夫之目。

而爲之憂樂哉。故凡僕之汲汲於進者。其小得。蓋欲以具裘葛養窮孤。其大得。蓋欲以同吾之所樂於人耳。其他可否。自計已熟。誠不待人而後知。今足下乃復比之獻玉者。以爲必俟工人之剖。然後見知於天下。雖兩刖足。不爲病。且無使勅者再剋。誠足下相勉之意厚也。然仕進者。豈捨此而無門哉。足下謂我必待是而後進者。尤非相悉之辭也。僕之玉固未嘗獻。而足固未嘗刖。足下無爲爲我戚戚也。方今天下風俗。尚有未及於古者。邊境尚有被甲執兵者。主上不得怡。而宰相以爲憂。僕雖不賢。亦且潛究其得失。致之乎吾相。薦之乎吾君。上希卿大夫之位。下猶取一障而乘之。若都不可得。猶將耕於寬閑之野。釣於寂寞之

韓文公集卷之二十一
濱求國家之遺事考賢人哲士之終始作唐之一經垂之於無窮誅姦諛於旣死發潛德之幽光二者將必有一可足下以爲僕之玉几幾獻而足几幾刖也又所謂勅者果誰哉再剋之刑信如何也士固信於知己微足下無以發吾之狂言愈再拜

荅李翊書

六月二十六日愈白李生足下生之書辭甚高而其問何下而恭也能如是誰不欲告生以其道道德之歸也有日矣况其外之文乎抑愈所謂望孔子之門牆而不入于其宮者焉足以知是且非邪雖然不可不爲生言之生所謂立言者是也生所爲者與所期者甚似而幾矣抑不知生

之志。蘄勝於人而取於人邪。將蘄至於古之立言者邪。蘄勝於人而取於人。則固勝於人而可取於人矣。將蘄至於古之立言者。則無望其速成。無誘於勢利。養其根而竢其實。加其膏而希其光。根之茂者。其實遂。膏之沃者。其光晔。仁義之人。其言藹如也。抑又有難者。愈之所爲。不自知其至猶未也。雖然。學之二十餘年矣。始者非三代兩漢之書。不敢觀。非聖人之志。不敢存。處若忘。行若遺。儼乎其若思。茫乎其若迷。當其取於心而注於手也。惟陳言之務去。憂戛乎其難哉。其觀於人。不知其非笑之爲非笑也。如是者。亦有年。猶不改。然後識古書之正僞。與雖正而不至焉者。昭昭然。白黑分矣。而務去之。乃徐有得也。當其取於心而

注於手也。汨汨然來矣。其觀於人也。笑之則以爲喜。譽之則以爲憂。以其猶有人之說者存也。如是者亦有年。然後浩乎其沛然矣。吾又懼其雜也。迎而距之。平心而察之。其皆醇也。然後肆焉。雖然不可以不養也。行之乎仁義之途。游之乎詩書之源。無迷其途。無絕其源。終吾身而已矣。氣水也。言浮物也。水大而物之浮者大小畢浮。氣之與言猶是也。氣盛則言之短長與聲之高下者皆宜。雖如是其敢自謂幾於成乎。雖幾於成其用於人也奚取焉。雖然待用於人者其肖於器邪。用與舍屬諸人。君子則不然。處心有道。行已有方。用則施諸人。舍則傳諸其徒。垂諸文而爲後世法。如是者其亦足樂乎。其無足樂也。有志乎古者希矣。

志乎古必遺乎今吾誠樂而悲之亟稱其人所以勸之非
敢褒其可褒而貶其可貶也問於愈者多矣念生之言不
志乎利聊相爲言之愈白

重答翊書

愈白李生生之自道其志可也其所疑於我者非也人之
來者雖其心異於生其於我也皆有意焉君子之於人無
不欲其入於善寧有不可告而告之孰有可進而不進也
言辭之不酬禮貌之不答雖孔子不得行於互鄉宜乎余
之不爲也苟來者吾斯進之而已矣烏待其禮踰而情過
乎雖然生之志求知於我邪求益於我邪其思廣聖人之
道邪其欲善其身而使人不可及邪其何汲汲於知而求

待之殊也。賢不肖固有分矣。生其急乎其所自立而無患乎。人不已知。未嘗聞有響大而聲微者也。况愈之於生。懇懇邪。屬有腹疾。無聊不果。自書。愈白。

代張籍與李浙東書

月日。前某官某。謹東向再拜。寓書浙東觀察使中丞李公閣下。籍聞議論者皆云。方今居古方伯連帥之職。坐一方得專制於其境內者。惟閣下。心事皤皤。與俗輩不同。籍固以藏之胷中矣。近者閣下從事李協律。到京師。籍於李君友也不見六七年。聞其至。馳往省之。問無恙外。不暇出一言。且先賀其得賢主人。李君曰。子豈盡知之乎。吾將盡言之。數日。籍益聞所不聞。籍私獨喜。常以爲自今已後不

復有如古人者。於今忽有之。退自悲。不幸兩目不見物。無用於天下。胷中雖有知識。家無錢財。寸步不能自致。今去李中丞五千里。何由致其身於其人之側。開口一吐出胷中之奇乎。因飲泣不能語。旣數日。復自奮曰。無所能人。乃宜以盲廢。有所能人。雖盲。當廢於俗輩。不當廢於行古人之道者。浙水東七州戶。不下數十萬。不盲者何限。李中丞取人。固當問其賢不賢。不當計其盲與不盲也。當今盲於心者皆是。若籍自謂獨盲於目爾。其心則能別是非。若賜之坐而問之。其口固能言也。幸未死。實欲一吐出心中平生所知。見閣下能信而致之於門邪。籍又善於古詩。使其心不以憂衣食亂。閣下無事時。一致之座側。使跪進其所

有。閣下憑几而聽之。未必不如聽吹竹彈絲敲金擊石也。夫盲者業專於藝。必精。故樂工皆盲。籍儻可與此輩比並乎。使籍誠不以蓄妻子憂饑寒亂心。有錢財以濟醫藥。其盲未甚。庶幾其復見天地日月。因得不廢。則自今至死之年。皆閣下之賜。閣下濟之以已絕之年。賜之以既盲之視。其恩輕重大小。籍宜如何報也。閣下裁之。度之。籍慙覲再拜。

答李秀才書

愈白。故友李觀元賓。十年之前。示愈別吳中故人詩六章。其首章則吾子也。盛有所稱引。元賓行峻潔清。其中狹隘。不能包容於尋常人。不肯苟有論說。因究其所以。於是知

吾子非庸衆人時吾子在吳中其後愈出在外無因緣相見元賓旣歿其文益可貴重思元賓而不見見元賓之所與者則如元賓焉今者辱惠書及文章觀其姓名元賓之聲容恍若相接讀其文辭見元賓之知人交道之不污甚矣子之心有似於吾元賓也子之言以愈所爲不違孔子不以琢雕爲工將相從於此愈敢自愛其道而以辭讓爲事乎然愈之所志於古者不惟其辭之好好其道焉爾讀吾子之辭而得其所用心將復有深於是者與吾子樂之況其外之文乎愈頓首

荅陳生書

愈白陳生足下今之負名譽享顯榮者在上位幾人足下

求速化之術。不於其人。乃以訪愈。是所謂借聽於聾。求道於盲。雖其請之勤勤。教之云云。未有見其得者也。愈之志在古道。又甚好其言辭。觀足下之書。及十四篇之詩。亦云有志於是矣。而其所問則名。所慕則科。故愈疑於其對焉。雖然。厚意不可虛辱。聊爲足下誦其所聞。蓋君子病乎在已。而順乎在天。待已以信。而事親以誠。所謂病乎在已者。仁義存乎內。彼聖賢者能推而廣之。而我蠢焉爲衆人所謂順乎在天者。貴賤窮通之來。平吾心而隨順之。不以累于其初。所謂待已以信者。已果能之人。曰不能。勿信也已。果不能。人曰能之。勿信也。孰信哉。信乎已而已矣。所謂事親以誠者。盡其心。不夸於外。先乎其質。後乎其文者也。盡

其心不夸於外者。不以已之得於外者爲父母榮也。名與位之謂也。先乎其質者行也。後乎其文者。飲食旨甘。以其外物供養之道也。誠者不欺之名也。待於外而後爲養。薄於質而厚於文。斯其不類於欺歟。果若是。子之汲汲於科名。以不得進爲親之羞者。惑也。速化之術如是而已。古之學者。惟義之問。誠將學於太學。愈猶守是說而竢見焉。愈白。

與李翱書

使至辱足下書。歡愧來并。不容于心。嗟乎。子之言意皆是也。僕雖巧說。何能逃其責邪。然皆子之愛我多。重我厚。不酌時人待我之情。而以子之待我之意。使我望於時人也。

僕之家本窮空。重遇攻劫。衣服無所得。養生之具無所有。家累僅三十口。攜此將安所歸託乎。捨之入京。不可也。挈之而行。不可也。足下將安以爲我謀哉。此一事耳。足下謂我入京城有所益乎。僕之有子。猶有不知者。時人能知我哉。持僕所守。驅而使奔走伺候公卿間。開口論議。其安能有以合乎。僕在京城八九年。無所取資。日求於人。以度時月。當時行之不覺也。今而思之。如痛定之人。思當痛之時。不知何能自處也。今年加長矣。復驅之使就其故地。是亦難矣。所貴乎京師者。不以明天子在上。賢公卿在下。布衣韋帶之士。談道義者多乎。以僕遑遑于其中。能上聞而下達乎。其知我者固少。知而相愛不相忌者。又加少。內無所

資外無所從終安所爲乎嗟乎子之責我誠是也愛我誠多也今天下之人有如子者乎自堯舜以來士有不遇者乎無也子獨安能使我潔清不污而處其所可樂哉非不願爲子之所云者力不足勢不便故也僕於此豈以爲大相知乎累累隨行役役逐隊饑而食飽而嬉者也其所以止而不去者以其心誠有愛於僕也然所愛於我者少不知我者猶多吾豈樂於此乎哉將亦有所病而求息於此也嗟乎子誠愛我矣子之所責於我者誠是矣然恐子有時不暇責我而悲我不暇悲我而自責且自悲也及之而後知履之而後難耳孔子稱顏回一簞食一瓢飲人不堪其憂回也不改其樂彼人者有聖者爲之依歸而又有簞

韓文卷之十六終
食瓢飲足以不死其不憂而樂也豈不易哉若僕無所依
歸無簞食無瓢飲無所取資則餓而死其不亦難乎子之
聞我言亦悲矣嗟乎子亦慎其所之哉離違久乍還侍左
右當日懽喜故專使馳此候足下意并以自解愈再拜

韓文卷之十六終

韓文卷之十七

書

上張僕射書

九月一日。愈再拜。受牒之明日。在使院中。有小吏持院中故事。節目十餘事。來示愈。其中不可者。有自九月至明年二月之終。皆晨入夜歸。非有疾病事故。輒不許出。當時以初受命。不敢言。古人有言曰。人各有能有不能。若此者。非愈之所能也。抑而行之。必發狂疾。上無以承事于公。忘其將所以報德者。下無以自立。喪失其所以爲心。夫如是。則安得而不言。凡執事之擇於愈者。非爲其能晨入夜歸也。必將有以取之。苟有以取之。雖不晨入而夜歸。其所取者。

猶在也。下之事上。不一其事。上之使下。不一其事。量力而任之。度才而處之。其所不能。不彊使爲。是故爲下者。不獲罪於上。爲上者。不得怨於下矣。孟子有云。今之諸侯。無大相過者。以其皆好臣其所教。而不好臣其所受教。今之時。與孟子之時。又加遠矣。皆好其聞命而奔走者。不好其直已而行道者。好義者也。未有好利而愛其君者。未有好義而忘其君者。今之主公大人。惟執事可以聞此言。惟愈於執事也。可以此言進。愈蒙幸於執事。其所從舊矣。若寬假之。使不失其性。加待之。使足以爲名。寅而入。盡辰而退。申而入。終酉而退。率以爲常。亦不廢事。天下之人。聞執事之於愈如是也。必

皆曰執事之好士也如此執事之待士以禮如此執事之
使人不枉其性而能有容如此執事之欲成人之名如此
執事之厚於故舊如此又將曰韓愈之識其所依歸也如
此韓愈之不諂屈於富貴之人如此韓愈之賢能使其主
待之以禮如此則死於執事之門無悔也若使隨行而入
逐隊而趨言不敢盡其誠道有所屈於已天下之人聞執
事之於愈如此皆曰執事之用韓愈哀其窮收之而已耳
韓愈之事執事不以道利之而已耳苟如是雖日受千金
之賜一歲九遷其官感恩則有之矣將以稱於天下曰知
已則未也伏惟哀其所不足矜其愚不錄其罪察其辭而
垂仁採納焉愈恐懼再拜

荅胡生書

愈頓首。胡生秀才足下。雨不止。薪芻價益高。生遠客懷道。守義非其人。不交。得無病乎。斯須不展思想。無已。愈不善自謀。口多而食寡。然猶月有所入。以愈之不足。知生之窮也。至於是而不悔。非信道篤者。其誰能之。所示千百言。略不及此。而以不屢相見爲憂。謝相知爲急。謀道不謀食。樂以忘憂者。生之謂矣。顧無以當之。如何。夫別是非。分賢與不肖。公卿貴位者之任也。愈不敢有意於是。如生之徒。於我厚者。知其賢。時或道之。於生未有益也。不知者。乃用是爲謗。不敢自愛。懼生之無益而有傷也。如之何。若曰。彼有所合。吾不利其求。則庶可矣。生又離鄉邑。去親愛。甘辛苦。

而不厭者。本非爲是也。如之何。愈之於生。旣不變矣。戒生無以示愈者。語於人。用息不知者之謗。生慎從之。講禮釋友二篇。比舊尤佳。志深而喻切。因事以陳辭。古之作者。正如是爾。愈頓首。

與于襄陽書

七月三日。將仕郎守國子四門博士韓愈。謹奉書尚書閣下。士之能享大名。顯當世者。莫不有先達之士。負天下之望者。爲之前焉。士之能垂休光照後世者。亦莫不有後進之士。負天下之望者。爲之後焉。莫爲之前。雖美而不彰。莫爲之後。雖盛而不傳。是二人者。未始不相須也。然而千百載。乃一相遇焉。豈上之人無可援。下之人無可推歟。何其

相須之殷而相遇之疎也。其故在下之人負其能不肖諂其上。上之人負其位不肖顧其下。故高材多戚戚之窮。盛位無赫赫之光。是二人者之所爲皆過也。未嘗于之不可謂上無其人。未嘗求之不可謂下無其人。愈之誦此言久矣。未嘗敢以聞於人。側聞閣下抱不世之才。特立而獨行。道方而事實。卷舒不隨乎時。文武惟其所用。豈愈所謂其人哉。抑未聞後進之士有遇知於左右。獲禮於門下者。豈求之而未得耶。將志存乎立功。而事專乎報主。雖遇其人。未暇禮耶。何其宜聞而久不聞也。愈雖不材。其自處不肖後於恒人。閣下將求之而未得歟。古人有言。請自隗始。愈今者惟朝夕芻米僕賃之資是急。不過費閣下一朝之享。

而足也。如曰吾志存乎立功，而事專乎報主，雖遇其人，未暇禮焉，則非愈之所敢知也。世之齷齪者，既不足以語之，磊落奇偉之人，又不能聽焉，則信乎命之窮也。謹獻舊所爲文一十八首，如賜覽觀，亦足知其志之所存。愈恐懼再拜。

與崔羣書

自足下離東都，凡兩度枉問，尋承已達宣州。主人仁賢，同列皆君子，雖抱羈旅之念，亦且可以度日。無入而不自得，樂天知命者，固前修之所以禦外物者也。況足下度越此等百千輩，豈以出處近遠累其靈臺耶？宣州雖稱清涼高爽，然皆大江之南，風土不並以北。將息之道，當先理其心。

心閒無事。然後外患不入。風氣所宜。可以審備。小小者亦當自不至矣。足下之賢。雖在窮約。猶能不改其樂。況地至近。官榮祿厚。親愛盡在左右者耶。所以如此云云者。以爲足下賢者。宜在上位。託於幕府。則不爲得其所。是以及之。乃相親重之道耳。非所以待足下者也。僕自少至今。從事於往還朋友間。一十七年矣。日月不爲不久。所與交往相識者。千百人。非不多。其相與如骨肉兄弟者。亦且不少。或以事同。或以藝取。或慕其一善。或以其久故。或初不甚知。而與之已密。其後無大惡。因不復決捨。或其人雖不皆入於善。而於已已厚。雖欲悔之不可。凡諸淺者。固不足道。深者止如此。至於心所仰服。考之言行而無瑕尤。窺之閭奧。

而不見畛域明白淳粹輝光日新者惟吾崔君一人僕愚
陋無所知曉然聖人之書無所不讀其精麤巨細出入明
晦雖不盡識抑不可謂不涉其流者也以此而推之以此
而度之誠知足下出羣拔萃無謂僕何從而得之也與足
下情義寧須言而後自明耶所以言者懼足下以爲吾所
與深者多不置白黑於胷中耳旣謂能麤知足下而復懼
足下之不我知亦過也比亦有人說足下誠盡善盡美抑
猶有可疑者僕謂之曰何疑疑者曰君子當有所好惡好
惡不可不明如清河者人無賢愚無不說其善伏其爲人
以是而疑之耳僕應之曰鳳凰芝草賢愚皆以爲美瑞青
天白日奴隸亦知其清明譬之食物至於遐方異味則有

嗜者有不嗜者。至於稻也。粱也。膾也。胾也。音也。豈聞有不嗜者哉。疑者乃解。解不解。於吾崔君無所損益也。自古賢者少。不肖者多。自省事已來。又見賢者恒不遇。不賢者比肩青紫。賢者恒無以自存。不賢者志滿氣得。賢者雖得卑位。則旋而死。不賢者或至眉壽。不知造物者意竟如何。無乃所好惡與人異心哉。又不知無乃都不省記。任其死生壽夭耶。未可知也。人固有薄卿相之官。千乘之位。而甘陋巷菜羹者。同是人也。猶有好惡如此之異者。況天之與人。當必異其所好惡無疑也。合於天而乖於人。何害。況又時有兼得者耶。崔君崔君。無怠無怠。僕無以自全活者。從一官於此。轉困窮甚。思自放於伊潁之上。當亦終得之。近者尤

衰憊左車第二牙無故動搖脫去目視昏花尋常間便不分人顏色兩鬢半白頭髮五分亦白其一鬚亦有一莖兩莖白者僕家不幸諸父諸兄皆康彊早世如僕者又可以圖於久長哉以此忽忽思與足下相見一道其懷小兒女滿前能不顧念足下何由得歸北來僕不樂江南官滿便終老嵩下足下可相就僕不可去矣珍重自愛慎飲食少思慮惟此之望愈再拜

與陳給事書

愈再拜愈之獲見於閣下有年矣始者亦嘗辱一言之譽貧賤也衣食於奔走不得朝夕繼見其後閣下位益尊伺候於門牆者日益進夫位益尊則賤者日隔伺候於門牆

者日益進則愛博而情不專愈也道不加修而文日益有名夫道不加修則賢者不與文日益有名則同進者忌始之以日隔之䟽加之以不專之望以不與者之心聽忌者之說由是閣下之庭無愈之迹矣去年春亦嘗一進謁於左右矣溫乎其容若加其新也屬乎其言若閔其窮也退而喜也以告於人其後如東京取妻子又不得朝夕繼見及其還也亦嘗一進謁於左右矣邈乎其容若不察其愚也悄乎其言若不接其情也退而懼也不敢復進今則釋然悟翻然悔曰其邈也乃所以怒其來之不繼也其悄也乃所以示其意也不敏之誅無所逃避不敢遂進輒自䟽其所以并獻近所爲復志賦已下十首爲一卷卷有標軸

送孟郊序一首生紙寫不加裝飾皆有楷字注字處急於自解而謝不能竣更寫閣下取其意而略其禮可也愈恐懼再拜。

荅馮宿書

垂示僕所闕非情之至僕安得聞此言朋友道缺絕久無有相箴規磨切之道僕何幸乃得吾子僕常閑時俗人有耳不自聞其過慄慄然惟恐已之不自聞也而今而後有望於吾子矣然足下與僕交久僕之所守足下之所熟知在京城時囂囂之徒相訾百倍足下時與僕居朝夕同出入起居亦見僕有不善乎然僕退而思之雖無以獲罪於人亦有以獲罪於人者僕在京城一年不一至貴人之門

草
卷之二十一
人之所趨。僕之所傲。與已合者。則從之遊。不合者。雖造吾廬。未嘗與之坐。此豈徒足致謗而已。不戮於人。則幸也。追思之。可爲戰慄寒心。故至此已來。剋已自下。雖不肖人至。未嘗敢以貌慢之。況時所尚者耶。以此自謂。庶幾無時患。不知猶復云云也。聞流言不信其行。嗚呼。不復有斯人也。君子不爲小人之恟恟而易其行。僕何能爾。委曲從順。向風承意。汲汲恐不得合。猶且不免云云。命也可如何。然子路聞其過。則喜。禹聞昌言。則下車拜。古人有言曰。告我以吾過者。吾之師也。願足下不憚煩。苟有所聞。必以相告。吾亦有以報子。不敢虛也。不敢忘也。

與衛中行書

大受足下辱書爲賜甚大然所稱道過盛豈所謂誘之而欲其至於是歟不敢當不敢當其中擇其一二近似者而竊取之則於交友忠而不反於背面者少似近焉亦其心之所好耳行之不倦則未敢自謂能爾也不敢當不敢當至於汲汲於富貴以救世爲事者皆聖賢之事業知其智能謀力能任者也如愈者又焉能之始相識時方甚貧衣食於人其後相見於汴徐二州僕皆爲之從事日月有所入比之前時豐約百倍足下視吾飲食衣服亦有異乎然則僕之心或不爲此汲汲也其所不忘於仕進者亦將小行乎其志耳此未易遽言也凡禍福吉凶之來似不在我惟君子得禍爲不幸而小人得禍爲恒君子得福爲恒而

小人得福爲幸。以其所爲似有以取之也。必曰君子則吉。小人則凶者。不可也。賢不肖存乎已。貴與賤禍與福存乎天。名聲之善惡存乎人。存乎已者。吾將勉之。存乎天存乎人者。吾將任彼而不用吾力焉。其所守者。豈不約而易行哉。足下曰。命之窮通自我爲之。吾恐未合於道。足下徵前世而言之。則知矣。若曰以道德爲已任。窮通之來不接吾心。則可也。窮居荒涼。草樹茂密。出無驢馬。因與人絕。一室之內。有以自娛。足下喜吾復脫禍亂。不當安安而居。遲遲而來也。

上張僕射第二書

愈再拜。以擊毬事諫執事者多矣。諫者不休。執事不止。此

非爲其樂不可捨其諫不足聽故哉諫不足聽者辭不足
感心也樂不可捨者患不能切身也今之言毬之害者必
曰有危墮之憂有激射之虞小者傷面目大者殘形軀執
事聞之若不聞者其意必曰進若習熟則無危墮之憂避
能便捷則免激射之虞小何傷於面目大何累於形軀者
哉愈今所言皆不在此其指要非以他事外物牽引相比
也特以擊毬之間之事明之耳馬之與人情性殊異至於
筋骸之相束血氣之相持安佚則適勞頓則疲者同也乘
之有道步驟折中少必無疾老必後衰及以之馳毬於場
蕩搖其心腑振撓其骨筋氣不及出入走不及廻旋遠者
三四年近者一二年無全馬矣然則毬之害於人也決矣

凡五藏之繫絡甚微坐立必懸垂於胸臆之間而以之顛
頓馳騁嗚呼其危哉春秋傳曰夫有尤物足以移人苟非
德義則必有禍雖豈弟君子神明所扶持然廣慮之深思
之亦養壽命之一端也愈恐懼再拜

與馮宿論文書

辱示初筮賦實有意思但力爲之古人不難到但不知直
似古人亦何得於今人也僕爲文久每自則意中以爲好
則人必以爲惡矣小稱意人亦小怪之大稱意卽人必大
怪之也時時應事作俗下文字下筆令人慚及示人則人
以爲好矣小慚者亦蒙謂之小好大慚者卽必以爲大好
矣不知古文真何用於今世也然以竢知者知耳昔揚子

雲著太玄人皆笑之。子雲之言曰：世不我知，無害也。後世復有揚子雲，必好之矣。子雲死，近千載，竟未有揚子雲，可歎也。其時桓譚亦以爲雄，書勝老子。老子未足道也。子雲豈止與老子爭彊而已乎？此未爲知雄者。其弟子侯芭頗知之以爲其師之書勝周易，然侯之他文不見於世，不知其人果如何耳。以此而言，作者不祈人之知也明矣。直百世以俟聖人而不惑，質諸鬼神而無疑耳。足下豈不謂然乎？近李翱從僕學文，頗有所得。然其人家貧多事，未能卒其業。有張籍者，年長於翱，而亦學於僕，其文與翱相上下。一二年業之，庶幾乎至也。然閱其棄俗尚而從於寂寞之道，以之爭名於時也，久不談。聊感足下能自進於此，故復

發憤一道愈再拜。

與祠部陸員外書

執事好賢樂善孜孜以薦進良士明白是非爲己任方今天下一人而已愈之獲幸於左右其足跡接於門牆之間陞乎堂而望乎室者亦將一年於今矣念慮所及輒欲不自疑外竭其愚而道其志况在執事之所孜孜爲己任者得不少助而張之乎誠不自識其言之可采與否其事則小人之事君子盡心之道也天下之事不可遽數又執事之志或有待而爲未敢二三言也今但言其最近而切者爾執事之與司貢士者相知誠深矣彼之所望於執事執事之所以待乎彼者可謂至而無間疑矣彼之職在乎得人

執事之志在乎進賢如得其人而授之所謂兩得其求順乎其必從也執事之知人其亦博矣夫子之言曰舉爾所知然則愈之知者亦可言已文章之尤者有侯喜者侯雲長者喜之家在開元中衣冠而朝者兄弟五六人及喜之父仕不達棄官而歸喜率兄弟操耒耜而耕于野地薄而賦多不足以養其親則以其耕之暇讀書而爲文以干於有位者而取足焉喜之文章學西京而爲也舉進士十五年矣雲長之文執事所自知其爲人淳重方實可任以事其文與喜相上下有劉述古者其文長於爲詩文麗而思深當今舉於禮部者其詩無與爲比而又工於應主司之試其爲人溫良誠信無邪佞詐妄之心彊志而婉容和

平而有立其趨事靜以敏著美名而負屈稱者其日已久矣有韋羣玉者京兆之從子其文有可取者其進而未止者也其爲人賢而有材志剛而氣和樂於薦賢爲善其在家無子弟之過居京兆之側遇事輒爭不從其令而從其義求子弟之賢而能業其家者羣玉是也凡此四子皆可以當執事首薦而極論者主司疑焉則以辯之問焉則以告之未知焉則殷勤而語之期乎有成而後止可也有沈杞者張荭者尉遲汾者李紳者張後餘者李翊者或文或行皆出羣之才也凡此數子與之足以收人望得才實主司疑焉則與解之問焉則以對之廣求焉則以告之可也往者陸相公司貢士考文章甚詳愈時亦幸在得中而未

知陸之得人也。其後一二年所與及第者皆赫然而聲。原其所以亦由梁補闕肅王郎中礎佐之。梁舉八人無有失者。其餘則王皆與謀焉。陸相之考文章甚詳也。待梁與王如此不疑也。梁與王舉人如此之當也。至今以爲美談。自後主司不能信人人亦無足信者。故蔑然無聞。今執事之與司貢士者有相信之資。謀行之道惜乎其不可失也。方今在朝廷者多以遊譙娛樂爲事。獨執事眇然高舉有深思長慮爲國家樹根本之道。宜乎小子之以此言聞于左右也。愈恐懼再拜。

韓文卷之十七終

卷之四

This image shows a blank, aged, cream-colored page, likely an endpaper or flyleaf of a book. The paper has a textured appearance with visible creases, discoloration, and a vertical line near the left edge. There is no text or other markings on the page.

以是意為因不歸亦本之意也平心之以此為因
 今主陣政以參以參補救災為事以參為事不
 與西貢士答其辭曰之為補救災為事不
 與主后不補計人人亦無以計其補救災為事
 以也亦無世災其王舉人亦以之為補救災為事
 答其補救王昔與補救災為事之為補救災為事
 其所以亦由參補救災為事之為補救災為事
 以補之計人亦其後一平而後又其後亦不

韓文卷之十八

書

與鳳翔邢尚書書

愈再拜。布衣之士，身居窮約，不借勢於王公大人，則無以成其志。王公大人，功業顯著，不借譽於布衣之士，則無以廣其名。是故布衣之士，雖甚賤而不諂；王公大人，雖甚貴而不驕。其事勢相須，其先後相資也。今閣下爲王爪牙，爲國藩垣，威行如秋，仁行如春，戎狄棄甲而遠遁，朝廷高枕而不虞。是豈負大丈夫平生之志願哉？豈負明天子非常之顧遇哉？赫赫乎，泂泂乎，功業逐日以新，名聲隨風而流，宜乎謹呼海隅高談之士，奔走天下慕義之人，使或願馳

一傳音轉或願操一戈納君於唐虞收地於河湟然而未至乎是者蓋亦有說云豈非待士之道未甚厚遇士之禮未甚優請粗言其事閣下試詳而聽之夫士之來也必有求於閣下夫以貧賤而求於富貴正其宜也閣下之財不可以徧施於天下在擇其人之賢愚而厚薄等級之可也假如賢者至閣下乃一見之愚者至不得見焉則賢者莫不至而愚者日遠矣假如愚者至閣下以千金與之賢者至亦以千金與之則愚者莫不至而賢者日遠矣欲求得士之道盡於此而已欲求士之賢愚在於精鑒博采之而已精鑒於已固已得其十七八矣又博采於人百無一二遺者焉若果能是道愈見天下之竹帛不足書閣下之功德

天下之金石不足頌閣下之形容矣。愈也布衣之士也。生七歲而讀書。十三而能文。二十五而擢第於春官。以文名於四方。前古之興亡。未嘗不經於心也。當世之得失。未嘗不留於意也。常以天下之安危在邊。故六月于邁。來觀其師。及至此都。徘徊而不能去者。誠悅閣下之義。願少立於堦墀之際。望見君子之威儀也。居十日而不敢進者。誠以左右無先爲容。懼閣下以衆人視之。則殺身不足以滅耻。徒悔恨於無窮。故先此書序其所以來之意。閣下其無以爲狂。而以禮進退之。幸甚幸甚。愈再拜。

爲人求薦書

某聞木在山。馬在肆。遇之而不顧者。雖日累千萬人。未爲

不材與下乘也。及至匠石過之而不睨。伯樂遇之而不顧。然後知其非棟梁之材。超逸之足也。以某在公之宇下。非一日。而又辱居姻婭之後。是生于匠石之園。長于伯樂之廐者也。於是而不得知。假有見知者。千萬人。亦何足云。今幸賴天子每歲詔公卿大夫貢士。若某等比。咸得以薦聞。是以冒進其說。以累於執事。亦不自量已然。執事其知某如何哉。昔人有鬻馬不售於市者。知伯樂之善相也。從而求之。伯樂一顧。價增三倍。某與其事頗相類。是故終始言之耳。某再拜。

應科目時與人書

月日愈再拜。天池之濱。大江之濱。曰有怪物焉。蓋非常鱗

凡介之品彙匹儔也。其得水變化風雨。上下于天。不難也。其不及水。蓋尋常尺寸之間耳。無高山大陵曠途絕險爲之關隔也。然其窮涸不能自致乎水。爲獮獺之笑者。蓋十八九矣。如有力者哀其窮而運轉之。蓋一舉手一投足之勞也。然是物也。負其異於衆也。且曰爛死於沙泥。吾寧樂之。若俛首帖耳。搖尾而乞憐者。非我之志也。是以有力者遇之。熟視之若無覩也。其死其生。固不可知也。今又有有力者當其前矣。聊試仰首一鳴號焉。庸詎知有力者不哀其窮而忘一舉手一投足之勞。而轉之清波乎。其哀之命也。其不哀之命也。知其命而且鳴號之者。亦命也。愈今者實有類於是。是以忘其踈愚之罪。而有是說焉。閣下其

亦憐察之。

答劉正夫書

愈白進士劉君足下。辱牋教以所不及。旣荷厚賜。且愧其誠然。幸甚。幸甚。凡舉進士者。於先進之門。何所不往。先進之於後輩。苟見其至。寧可以不答其意邪。來者則接之。舉城士大夫。莫不皆然。而愈不幸。獨有接後輩名。名之所存。謗之所歸也。有來問者。不敢不以誠答。或問爲文宜何師。必謹對曰。宜師古聖賢人。曰。古聖賢人所爲書具存。辭皆不同。宜何師。必謹對曰。師其意。不師其辭。又問曰。文宜易。宜難。必謹對曰。無難易。惟其是爾。如是而已。非固開其爲此。而禁其爲彼也。夫百物朝夕所見者。人皆不注視也。及

觀其異者則共觀而言之夫文豈異於是乎漢朝人莫不能爲文獨司馬相如太史公劉向揚雄爲之最然則用功深者其收名也遠若皆與世沈浮不自樹立雖不爲當時所怪亦必無後世之傳也足下家中百物皆賴而用也然其所珍愛者必非常物夫君子之於文豈異於是乎今後進之爲文能深探而力取之以古聖賢人爲法者雖未必皆是要若有司馬相如太史公劉向揚雄之徒出必自於此不自於循常之徒也若聖人之道不用文則已用則必尚其能者能者非他能自樹立不因循者是也有文字來誰不爲文然其存於今者必其能者也顧常以此爲說耳愈於足下忝同道而先進者又常從遊於賢尊給事旣辱

厚賜又安得不進其所有以爲答也足下以爲何如愈白

答殷侍御書

某月日愈頓首辱賜書周覽累日竦然增敬感然汗出以
慙愈於進士中粗爲知讀經書者一來應舉事隨日生雖
欲加功竟無其暇遊從之類相熟相同不教不學悶然不
見已缺日失月亡以至於老所謂無以自別於常人者每
逢學士真儒歎息踖踖愧生於中顏變於外不復自比於
人前者蒙示新注公羊春秋又聞口授指略私心喜幸恨
遭逢之晚願盡傳其學職事羈纏未得繼請怠惰因循不
能自彊此宜在擯而不教者今反謂少知根本其辭章近
古可令叙所注書惠出非望承命反側善誘不倦斯爲多

方敢不喻所指。八月益涼，時得休假，儻矜其拘綴，不得走請務道之傳，而賜辱臨，執經座下，獲卒所聞，是爲大幸。況近世公羊學幾絕，何氏注外不見他書，聖經賢傳屏而不省，要妙之義無自而尋，非先生好之樂之，味於衆人之所不味，務張而明之，其孰能勤勤綣綣若此之至固鄙心之所最急者。如遂蒙開釋，章分句斷，其心曉然，直使序所注挂名經端，自託不腐，其又奚辭。將惟先生所以命，愈再拜。

答陳商書

愈白：辱惠書，語高而旨深，三四讀尚不能通曉，茫然增愧赧，又不以其淺弊無過人知識，且喻以所守，幸甚。愈敢不吐情實，然自識其不足補吾子所須也。齊王好竽，有求仕

於齊者操瑟而往立王之門三年不得入叱曰吾瑟鼓之能使鬼神上下吾鼓瑟合軒轅氏之律呂客罵之曰王好竽而子鼓瑟雖工如王不好何是所謂工於瑟而不工於求齊也今舉進士於此世求祿利行道於此世而爲文必使一世人不肖得無與操瑟立齊門者比歟文雖工不利於求求不得則怒且怨不知君子必爾爲不也故區區之心每有來訪者皆有意於不肖者也略不辭讓遂盡言之惟吾子諒察愈白

與孟尚書書

愈白行官自南廻過吉州得吾兄二十四日手書數番忻悚無至未審入秋來眠食何似伏惟萬福來示云有人傳

愈近少信奉釋氏此傳之者妄也潮州時有一老僧號大顓頗聰明識道理遠地無可與語者故自山召至州郭留十數日實能外形骸以理自勝不爲事物侵亂與之語雖不盡解要自胸中無滯礙以爲難得因與來往及祭神至海上遂造其廬及來袁州留衣服爲別乃人之情非崇信其法求福田利益也孔子云丘之禱久矣凡君子行已立身自有法度聖賢事業具在方冊可效可師仰不愧天俯不愧人內不愧心積善積惡殃慶自各以其類至何有去聖人之道捨先王之法而從夷狄之教以求福利也詩不云乎愷悌君子求福不回傳又曰不爲威惕不爲利疚假如釋氏能與人爲禍祟非守道君子之所懼也况萬萬無

此理且彼佛者果何人哉其行事類君子邪小人邪若君子也必不妄加禍於守道之人如小人也其身已死其鬼不靈天地神祇昭布森列非可誣也又肯令其鬼行胷臆作威福於其間哉進退無所據而信奉之亦且惑矣且愈不助釋氏而排之者其亦有說孟子云今天下不之楊則之墨楊墨交亂而聖賢之道不明則三綱淪而九法斁禮樂崩而夷狄橫幾何其不爲禽獸也故曰能言拒楊墨者皆聖人之徒也楊子雲云古者楊墨塞路孟子辭而闢之廓如也夫楊墨行正道廢且將數百年以至於秦卒滅先王之法燒除其經坑殺學士天下遂大亂及秦滅漢興且百年尚未知脩明先王之道其后始除挾書之律稍求亡

書招學士。經雖少得。尚皆殘缺。十亡二三。故學士多老死。新者不見全經。不能盡知先王之事。各以所見爲守。分離乖隔。不合不公。二帝三王羣聖人之道。於是大壞。後之學者。無所尋逐。以至於今泯泯也。其禍出於楊墨肆行而莫之禁故也。孟子雖賢聖。不得位。空言無施。雖切何補。然賴其言。而今學者尚知宗孔氏。崇仁義。貴王賤霸而已。其大經大法。皆亡滅而不救。壞爛而不收。所謂存十一於千百。安在其能廓如也。然向無孟氏。則皆服左袵而言侏離矣。故愈嘗推尊孟氏。以爲功不在禹下者。爲此也。漢氏已來。羣儒區區。修補百孔千瘡。隨亂隨失。其危如一髮引千鈞。縣縣延延。寤以微滅。於是時也。而唱釋老於其間。鼓天下

之衆而從之。嗚呼！其亦不仁甚矣。釋老之害，過於楊墨。韓愈之賢，不及孟子。孟子不能救之於未亡之前，而韓愈乃欲全之於已壞之後。嗚呼！其亦不量其力，且見其身之危，莫之救以死也。雖然，使其道由愈而粗傳，雖滅死萬萬，無恨。天地鬼神臨之在上，質之在傍，又安得因一摧折，自毀其道以從於邪也？籍湜輩雖屢指教，不知果能不叛去否。辱吾兄眷厚，而不獲承命，惟增慙懼。死罪死罪。愈再拜。

答呂鑒山人書

愈白。惠書責以不能如信陵執轡者。夫信陵戰國公子，欲以取士聲勢傾天下而然耳。如僕者，自度若世無孔子，不當在弟子之列。以吾子始自山出，有朴茂之美，意恐未襲。

磨以世事。又自周後文弊。白子爲書。各自名家。亂聖人之宗。後生習傳。雜而不貫。故設問以觀吾子。其已成熟乎。將以爲友也。其未成熟乎。將以講去其非而趨是耳。不如六國公子有市於道者也。方今天下入仕。惟以進士明經及卿大夫之世耳。其人率皆習熟時俗。工於語言。識形勢。善候人主意。故天下靡靡。日入於衰壞。恐不復振起。務欲進足下。趨死不顧利害。去就之人於朝。以爭救之耳。非謂當今公卿間無足下輩文學知識也。不得以信陵比。然足下衣破衣。繫麻鞋。率然叩吾門。吾待足下。雖未盡賓主之道。不可謂無意者。足下行天下。得此於人。蓋寡。乃遂能責不足於我。此真僕所汲汲求者。議雖未中節。其不肯阿曲以

事人者灼灼明矣。方將坐足下三浴而三熏之。聽僕之所爲。少安無躁。愈頓首。

答渝州李使君書

乖隔年多。不獲數附書。慕仰風味。未嘗敢忘。使至連辱兩書。告以恩情迫切。不自聊賴。重序河南事跡本末。文字稠密。典實可尋。而推究之明。萬萬無一可疑者。欽想所爲益深。勤企豈以愈爲粗。有知識可語以心。而告之急哉。是比數愈於人。而收之何幸之大也。愈雖無節槩。知感激。若使在形勢。親狎於要路。有言可信之望。雖百悔吝。不敢默默。今旣無由緣進言。言之恐益累高明。是以負所期待。竊竊轉語於人。不見成效。此愈之罪也。然不敢去心。期之無已。

以報見待。惟且遲之。勿遽捐罷。幸甚。莊子云。知其無可奈何。而安之若命者。聖也。傳曰。君子俟命。然無所補益。進其厭飫者。祇增愧耳。良務寬大。愈再拜。

荅元侍御書

九月五日。愈頓首。微之足下。前歲辱書。論甄逢父濟。識安祿山必反。即詐爲啗棄去。祿山反。有名號。又逼致之。濟死。執不起。卒不汙祿山父子事。又論逢知讀書。刻身立行。勤已取足。不干州縣。斥其餘以救人之急。足下繇是與之交。欲令逢父子名迹存諸史氏。足下以抗直喜立事。斥不得立朝。失所不自悔。喜事益堅。微之乎。子員安而樂之者。謹詳足下所論。載校之史法。若濟者。固當得附書。今逢又能

行身幸於方州大臣以標白其先人事載之天下耳目徹之天子追爵其父第四品赫然驚人逢與其父俱當得附書矣濟逢父子自吾人發春秋美君子樂道人之善夫苟能樂道人之善則天下皆去惡爲善善人得其所其功實大足下與濟父子俱宜牽聯得書足下勉逢令終始其窮而足下年尚疆嗣德有繼將大書特書屢書不一書而已也愈旣承命又執筆以竢愈再拜

韓文卷之十八終

韓文卷之十九

書序

與鄭相公書

再奉示問。皆緣孟家事。辭旨惻惻。憂慮深遠。竊有以見大
人君子篤於仁愛。終始不倦。伏讀感歎。不知所喻。舊與孟
往還數人。昨已共致百千。已來尋已至東都。計供葬事外。
尚有餘資。今裴押衙所送二百七十千。足以益業爲遺孀
永久之賴。孟氏兄弟在江東未至。先與相識。亦甚循善。所
慮才幹不足任事。鄭氏兄弟。惟最小者在東都。固如所示。
不可依仗。孟之深友。太子舍人樊宗師。比持服在東都。今
已外除。經營孟家事。不啻如已。前後人所與。及裴押衙所

送錢物並委樊舍人主之營致生業必能不失利宜候孟氏兄弟到分付成事庶可靜守無大闕敗伏惟不至遠憂續具一一諮報不宣愈再拜

與袁相公書

伏聞賓位尚有闕員幸蒙不以常輩知遇恒不自知愚且賤思有論薦竊見朝議郎前太子舍人樊宗師孝友聰明家故饒財身居長嫡悉推與諸弟諸弟皆優贍有餘而宗師妻子常寒露饑餒宗師怡然處之無有難色窮究經史章通句解至於陰陽軍法聲律悉皆研極原本又善爲文章詞句刻深獨追古作者爲徒不顧世俗輕重通微曉事可與晤語又習於吏職識時知變非如儒生文士止有偏長

退勇守專未爲宰物者所識年近五十遑遑勉勉思有所
試閣下儻引而致之密加識察有小不如所言愈爲欺罔
大君子便宜得棄絕之罪於門下誠不忍竒寶橫棄道側
而閣下篋櫝尚有少闕不滿之處猶足更容輒冒言之退
增汗懼謹狀

與鄂州柳中丞書

淮右殘孽尚守巢窟環寇之師殆且十萬瞋目語難自以
爲武人不肯循法度頡頏作氣勢竊爵位自尊大者肩相
磨地相屬也不聞有一人援桴鼓誓衆而前者但日令走
馬來求賞給助寇爲聲勢而已閣下書生也詩書禮樂是
習仁義是脩法度是束一旦去文就武鼓三軍而進之陳

師鞠旅親與爲辛苦慷慨感激同食下卒將二州之牧以壯士氣斬所乘馬以祭蹠死之士雖古名將何以加茲此由天資忠孝鬱於中而大作於外動皆中於機會以取勝於當世而爲戎臣師豈常習於威暴之事而樂其鬪戰之危也哉愈誠怯弱不適於用聽於下風竊自增氣誇於中朝稠人廣衆會集之中所以羞武夫之顏令議者知將國兵而爲人之司命者不在彼而在此也臨敵重慎誠輕出入良用自愛以副見慕之徒之心而果爲國立大功也幸甚幸甚不宣愈再拜

又一首

愈愚不能量事勢可否比常念淮右以靡弊困頓三州之

地蚊蚋蟻蟲之聚。感兇豎。煦濡飲食之惠。提童子之手。坐之堂上。奉以爲帥。出死力以抗逆。明詔戰天下之兵。乘機逐利。四出侵暴。屠燒縣邑。賊殺不辜。環其地數千里。莫不被其毒。洛汝襄荊。許潁淮江。爲之騷然。丞相公卿士大夫。勞於圖議。握兵之將。熊羆貔虎之士。畏懦蹙縮。莫肯杖戈爲士卒前行者。獨閣下奮然。率先揚兵界上。將二州之守。親出入行間。與士卒均辛苦。生其氣勢。見將軍之鋒。潁凜然有向敵之意。用儒雅文字章句之業。取先天下武夫。關其口而奪之氣。愚初聞時。方食不覺棄匕箸起立。豈以爲閣下真能引孤軍單進。與死寇角逐爭。一旦僥倖之利哉。就令如是。亦不足貴。其所以服人心。在行事適機宜。而風

采可畏愛故也。是以前狀輒述鄙誠眷惠手翰還荅益增欣悚。夫一衆人心力耳目使所至如時雨。三代用師不出是道。閣下果能充其言。繼之以無倦。得形便之地。甲兵足用。雖國家故所失地。旬歲可坐而得。况此小寇安足置齒牙間。勉而卒之。以俟其至。幸甚。夫遠徵軍士行者有羈旅離別之思。居者有怨曠騷動之憂。本軍有饋餉煩費之難。地主多姑息形迹之患。急之則怨。緩之則不用命。浮寄孤懸。形勢銷弱。又與賊不相諳委。臨敵恐駭。難以有功。若召募土人。必得豪勇。與賊相熟。知其氣力所極。無望風之驚。愛護鄉里。勇於自戰。徵兵滿萬。不如召募數千。閣下以爲何如。儻可上聞行之否。計已與裴中丞相見行營事宜。不

惜時賜示及幸甚不宜愈再拜。

荅魏博田僕射書

季冬極寒伏惟僕射尊體動止萬福卽日愈蒙免蒙恩改職事不任感懼使至奉十一月十二日示問欣慰殊深贊善十一郎行已附狀伏計尋上達愈雖未獲拜識嘗承僕射眷私猥辱薦聞待之上介事雖不允受賜實多頃者又蒙不以文字鄙薄令譔廟碑見遇殊常荷德尤切安有書問稍簡遂敢自疎比所與楊書記書蓋緣久闕附狀求因問粗述下情忽奉累紙示問辭意重疊捧讀再三但增慚悚僕射公忠賢德爲內外所宗位望益尊謙異滋甚謬承知遇欣荷實深伏望照察恨以官守拜奉未由無任馳戀

謹因使廻奉狀。不宜。謹狀。

與華州李尚書書

比來不審尊體動止何似。乍離闕庭。伏計倍增戀慕。愈於久故。游從之中。伏蒙恩獎。知待最深最厚。無有比者。懦弱昏塞。不能奮勵出奇。少荅所遇。拜辭之後。竊念旬朔不卽獲侍言笑。東望殞涕。有兒女子之感。獨宿直舍。無可告語。展轉欷歔。不能自禁。華州雖實百郡之首。重於藩維。然閣下居之。則爲失所。愚以爲苟慮有所及。宜密以上聞。不宜以疎外自待。接過客俗子。絕口不挂時事。務爲崇深。以拒止嫉妬之口。親近藥物方書。動作步趨。以致和宜滯。爲國自愛。副鄙陋拳拳之心。幸甚幸甚。謹奉狀。不宜。愈再拜。

京尹不臺參荅友人書

所示情眷之至，不勝悚荷。臺參實奏云：容桂觀察使帶中丞，尚不臺參。京尹郡國之首，所管神州赤縣，官帶大夫，豈得却不如事？須臺參。聖恩以爲然，便令宣與李紳不用臺參，亦是何典故？亦令尚與中丞分道而行，何況京尹人見近事，習耳目所熟，稍殊異，卽怪之。其於道理有何所傷？聖君使行，卽是故事。自古豈有定制也？停推巡，緣府中逼迫，是實。若別差人，卽是妄說。豈有此事？小人言不可信，類如此。亦在大賢斟酌而斷之。流言止於智者，正謂此耳。客多自修報狀，不得，伏惟照察。

送陸欽州詩序

貞元十八年二月十八日祠部員外郎陸君出刺歙州朝廷夙夜之賢都邑游居之良齎咨涕洟咸以爲不當去歙大州也刺史尊官也由郎官而往者前後相望也當今賦出於天下江南居十九宣使之所察歙爲富州宰臣之所薦聞天子之所選用其不輕而重也較然矣如是而齎咨涕洟以爲不當去者陸君之道行乎朝廷則天下望其賜刺一州則專而不能咸先一州而後天下豈吾君與吾相之心哉於是昌黎韓愈道願留者之心而泄其思作詩曰我衣之華兮我佩之光陸君之去兮誰與翱翔歙此大惠兮施于一州今其去矣胡不爲留我作此詩歌于達道無疾其驅天子有詔

送孟東野序

大凡物不得其平則鳴草木之無聲風撓之鳴水之無聲風蕩之鳴其躍也或激之其趨也或梗之其沸也或炙之金石之無聲或擊之鳴人之於言也亦然有不得已者而後言其詞也有思其哭也有懷凡出乎口而爲聲者其皆有弗平者乎樂也者鬱於中而泄於外者也擇其善鳴者而假之鳴金石絲竹匏土革木八者物之善鳴者也維天之於時也亦然擇其善鳴者而假之鳴是故以鳥鳴春以雷鳴夏以蟲鳴秋以風鳴冬四時之相推敘其必有不得其平者乎其於人也亦然人聲之精者爲言文辭之於言又其精也尤擇其善鳴者而假之鳴其在唐虞咎陶禹其

善鳴者也。而假以鳴。夔弗能以文辭鳴。又自假於韶以鳴。夏之時。五子以其歌鳴。伊尹鳴殷。周公鳴周。凡載於詩書六藝。皆鳴之善者也。周之衰。孔子之徒鳴之。其聲大而遠。傳曰。天將以夫子爲木鐸。其弗信矣乎。其末也。莊周以其荒唐之辭鳴。楚大國也。其亡也以屈原鳴。臧孫辰。孟軻。荀卿。以道鳴者也。楊朱。墨翟。管夷吾。晏嬰。老聃。申不害。韓非。宓到。田駢。鄒衍。尸佼。孫武。張儀。蘇秦之屬。皆以其術鳴。秦之興。李斯鳴之。漢之時。司馬遷。相如。揚雄。最其善鳴者也。其下。魏晉氏鳴者。不及於古。然亦未嘗絕也。就其善者。其聲清以浮。其節數以急。其辭淫以哀。其志弛以肆。其爲言也。亂雜而無章。將天醜其德。莫之顧耶。何爲乎不鳴。其善

鳴者也。唐之有天下，陳子昂、蘇源明、元結、李白、杜甫、李觀，皆以其所能鳴，其存而在下者。孟郊、東野始以其詩鳴，其高出魏晉，不懈而及於古，其他浸淫乎漢氏矣。從吾遊者，李翱、張籍其尤也。三子者之鳴，信善矣。抑不知天將和其聲，而使鳴國家之盛耶？抑將窮餓其身，思愁其心腸，而使自鳴其不幸耶？三子者之命，則懸乎天矣。其在上也，奚以喜；其在下也，奚以悲。東野之役於江南也，有若不得然者，故吾道其命於天者以解之。

送許郢州序

愈嘗以書自通於于公，累數百言，其大要言先達之士得人而託之，則道德彰而名聞流；後進之士得人而託之，則

事業顯而爵位通。下有矜乎能。上有矜乎位。雖恒相求。而喜不相遇。于公不以其言爲不可。復書曰。足下之言是也。于公身居方伯之尊。蓄不世之材。而能與卑鄙庸陋相應。答如影響。是非忠乎君而樂乎善。以國家之務爲已任者乎。愈雖不敢私其大恩。抑不可不謂之知己。恒矜而誦之情已至。而事不從小人之所不爲也。故於使君之行。道刺史之事。以爲于公贈。凡天下之事成於自同。而敗於自異。爲刺史者。恒私於其民。不以實應乎府。爲觀察使者。恒急於其賦。不以情信乎州。繇是刺史不安其官。觀察使不得其政。財已竭而歛不休。人已窮而賦愈急。其不去爲盜也。亦幸矣。誠使刺史不私於其民。觀察使不急於其賦。刺史曰。

吾州之民天下之民也。惠不可以獨厚。觀察使亦曰。某州之民天下之民也。歛不可以獨急。如是而政不均。令不行者。未之有也。其前之言者。于公旣已信而行之矣。今之言者。其有不信乎。縣之於州。猶州之於府也。有以事乎上。有以臨乎下。同則成。異則敗者。皆然也。非使君之賢。其誰能信之。愈於使君。非燕游一朝之好也。故其贈行。不以頌而以規。

送竇從事序

踰甌閩而南。皆百越之地。於天文。其次星紀。其星牽牛。連山隔其陰。鉅海蔽其陽。是維島居卉服之民。風氣之殊。著自古昔。唐之有天下。號令之所加。無異於遠近。民俗旣遷。

風氣亦隨雪霜時降。癘疫不興。瀕海之饒。固加於初。是以人之之南海者。若東西州焉。皇帝臨天下二十有二年。詔工部侍郎趙植爲廣州刺史。盡牧南海之民。署從事扶風竇平。平以文辭進於其行也。其族人殿中侍御史牟。合東都交游之能文者二十有八人。賦詩以贈之。於是昌黎韓愈。嘉趙南海之能得人。壯從事之荅於知我。不憚行之遠也。又樂貽周之愛其族。叔父能合文辭以寵榮之。作送竇從事少府平序。

上巳日燕太學聽彈琴詩序

與衆樂之之謂樂。樂而不失其正。又樂之尤也。四方無鬪爭。金革之聲。京師之人。旣庶且豐。天子念致理之艱難。樂

居安之間暇。肇置三令節。詔公卿羣有司。至于其日。率厥官屬。飲酒以樂。所以同其休。宣其和。感其心。成其文者也。三月初吉。實惟其時。司業武公。於是總太學儒官三十有六人。列燕于祭酒之堂。罇俎旣陳。肴羞惟時。醖筆序行。獻酬有容。歌風雅之古辭。斥夷狄之新聲。襲衣危冠。與與如也。有儒一生。魁然其形。抱琴而來。歷階以昇。坐于罇俎之南。鼓有虞氏之南風。賡之以文王宣父之操。優游夷愉。廣厚高明。追三代之遺音。想舞雩之詠歎。及暮而退。皆充然若有得也。武公於是作歌詩以美之。命屬官咸作之。命四門博士昌黎韓愈序之。

送齊皞下第序

古之所謂公無私者其取捨進退無擇於親疎遠邇惟其
 宜可焉其下之視上也亦惟視其舉黜之當否不以親疎
 遠邇疑乎其上之人故上之人行志擇誼坦乎其無憂於
 下也下之人剋已慎行確乎其無惑於上也是故爲君不
 勞而爲臣甚易見一善焉可得詳而舉也見一不善焉可
 得明而去也及道之衰上下交疑於是乎舉讐舉子之事
 載之傳中而稱美之而謂之忠見一善焉若親與邇不敢
 舉也見一不善焉若疎與遠不敢去也衆之所同好焉矯
 而黜之乃公也衆之所同惡焉激而舉之乃忠也於是乎
 有違心之行有怫志之言有內媿之名若然者俗所謂良
 有司也膚受之訴不行於君巧言之誣不起於人矣烏虺

今之君天下者不亦勞乎爲有司者不亦難乎爲人嚮道者不亦勤乎是故端居而念焉非君人者之過也則曰有司焉則非有司之過也則曰今舉天下人焉則非今舉天下人之過也蓋其漸有因其本有根生於私其親成於私其身以已之不直而謂人皆然其植之也固久其除之也實難非百年必世不可得而化也非知命不惑不可得而改也已矣乎其終能復古乎若高陽齊生者其起予者乎齊生之兄爲時名相出藩于南朝之碩臣皆其舊交齊生舉進士有司用是連枉齊生齊生不以云乃曰我之未至也有司其枉我哉我將利吾器而俟其時耳抱負其業東歸於家吾觀於人有不得志則非其上者衆矣亦莫計其

身之短長也。若齊生者，旣至矣，而曰我未也，不以關於有司，其不亦鮮乎哉？吾用是知齊生後日誠良有司也。能復古者也，公無私者也，知命不惑者也。

送陳密序

太學生陳密請於余曰：密承訓於先生，今將歸覲其親，不得朝夕見願先生賜之言。密將以爲戒。密來太學，舉明經，累年不獲選，是弗利於是科也。今將易其業，而三禮是習，願先生之張之也。密將以爲鄉榮。余媿乎其言，遺之言曰：子之業信習矣，其容信合於禮矣，抑吾所見者外也。夫外不足以信內，子誦其文，則思其義，習其儀，則行其道，則將謂子君子也。爵祿之來也，不可辭矣。科寧有利不利耶？

送李愿歸盤谷序

太行之陽有盤谷。盤谷之間，泉甘而土肥，草木蓂茂，居民鮮少。或曰：謂其環兩山之間，故曰盤。或曰：是谷也，宅幽而勢阻，隱者之所盤旋。友人李愿居之，愿之言曰：人之稱大丈夫者，我知之矣。利澤施于人，名聲昭于時，坐于廟朝，進退百官，而佐天子出令，其在外，則樹旗旄，羅弓矢，武夫前呵，從者塞途，供給之人，各執其物，夾道而疾馳，喜有賞，怒有刑，才峻滿前，道古今而譽盛德，入耳而不煩，曲眉豐頰，清聲而便體，秀外而惠中，飄輕裾，翳長袖，粉白黛綠者，列屋而閒居，妬寵而負恃，爭妍而取憐，大丈夫之遇知於天子，用力於當世者，之所爲也。吾非惡此而逃之，是有命焉。

不可幸而致也。窮居而閑處，升高而望遠，坐茂樹以終日，濯清泉以自潔，採於山，美可茹；釣於水，鮮可食。起居無時，惟適之安。與其有譽於前，孰若無毀於其後；與其有樂於身，孰若無憂於其心。車服不維，刀鋸不加，理亂不知，黜陟不聞。大丈夫不遇於時者之所爲也。我則行之，伺候於公卿之門，奔走於形勢之途，足將進而趨，起口將言而囁。處穢汙而不羞，觸刑辟而誅戮，徼倖於萬一，老死而後止者，其於爲人賢不肖何如也！昌黎韓愈聞其言而壯之，與之酒而爲之歌曰：

盤之中，維子之宮。盤之土，可以稼。盤之泉，可濯。可沿，盤之阻。誰爭子所，窈而深，廓其有容。繚而曲，如往而復。嗟盤之

樂兮。樂且無殃。虎豹遠跡兮。蛟龍遁藏。鬼神守護兮。呵禁不祥。飲則食兮。壽而康。無不足兮。奚所望。膏吾車兮。秣吾馬。從子于盤兮。終吾生以徜徉。

送牛堪序

以明經舉者。誦數十萬言。又約通大義。徵辭引類。旁出入他經者。又誦數十萬言。其爲業也勤矣。登第於有司者。去民畝而就吏祿。由是進而累爲卿相者。常常有之。其爲獲也亦大矣。然吾未嘗聞有登第於有司而進謝於其門者。豈有司之待之也。抑以公不以情舉者之望於有司也。亦將然乎。其進而謝於其門也。則爲私乎。抑無乃人事之未思。或者不能舉其禮乎。若牛堪者。思慮足以及之。材質足

以行之。而又不聞其往者。其將有以哉。違衆而求識。立竒而取名。非堪心之所存也。由是而觀之。若堪之用心。其至於大官也。不爲幸矣。堪太學生也。余博士也。博士師屬也。於其登第而歸。將榮於其鄉也。能無說乎。



韓文卷之十九終

